

AÑ CARTA ÑEÑT HEBREONESHACOP HEBREOS

*Te'ña Yompor Puechemerpa' ña e'ñe
ye'ñorana'terraya ñeñt atet oteñ Pompor yocop*

¹ E'ñe ahuatoteñ Yomporñapa' chocma eñorana'tyesane't ñeñt pueyochresha' pe't ñeñtcha' a'mta'yesaye't po'ñoñ ñeñtara profetanesha'. E'ñe pa'namenot eñotatyesanete't. Ñetñapa' o'ch eñotatennayet yatañneshañ judionesha' ñeñt atet otenanet Yompor. ² Tarraña te'ña yapa' e'ñe ña Puechemer o' eñorana'terraña ñeñt atet eñoreññaña Yompor yocop. Ñehua, ñeñtpa' ñeñtara Puechemer ñeñt Jesucristotets ñeñt ne't Pompor ahuatoteñ, ñach o'patenaya allohuen ñeñt ora allpon eñall, tarro'mar ña yeçhcataprete' ahuañ Pompor añ patser ñama allohuen ñeñt esocmañen pa'namen eñalleyestsa.

³ Ñeñtara Cristo atto atarr cohuentena ña pa'tsnomueñot, ñeñtpa' Pomporña orrtaten po'partsoña. Ñeñt atet cohuen orrtatyen ñapa', Pomporpa'cho'ña e'ñe parro attecaltet. Ñapa' e'ñe po'ñoñoña orrtatuan ora esocmañen ñeñt allpon pa'namen eñall tarro'mar ña po'ñoñpa' atarr huomenc. Ñeñtara ñeñt rromats attoch e'ñe e'sham̄pesuerrey yo'chñar. Allempoña o' orrtatuan atto e'sham̄perrey yo'chñar allempoñapa' o' alla anorruerr Pompor Parets

po'cohuenroñ allña atarr partsotapretuerrana
Pompor po'canaño e'ñe all pue'ntaño.

Ñeññ Yompor Puechemerpa' ña metana'tuene' al-
lohuen mellañoñeñnaneshá' atto atarr sherben ña

⁴ Ñeññó'marña te' ña ñapa' atarr amcha'tarettena,
ello metana'tuenan allohuen mellañoñeñnaneshá',
tarro'mar ñapa' ñeññ otenet ñapa' e'ñe Parets
Puechemer. Ñeññña mellañoñeñnaneshá' ñetpa'
ama atteye' otaretteteneto. ⁵ Ñama yeñoteñ
ñapa' ña e'ñe metana'tuenahuet tarro'mar
mellañoñeñnaneshá' ama't puesheñarroñetapa' ama
otaneto ñeññ ateñ otan Puechemer, ñeññpa' ateñ ot
Puechemerecop:

Papa' ña ñeññep e'ñe Nechemerep, te'ñapa' o'ch
e'ñe neñotachacheñenesha' po'ñoch ñapa'
e'ñe Nechemer nepenep.

Po'pocheñoñapa' ateñ oterrerr Puechemerecop:
Napa' na ñeññen Pompor, ñapa' no Nechemer.

⁶ Po'pocheñoña allempo ñchapatan Puechemer
po'moñer ñeññ atarr nanac sherbets aña patsro
ateñ eñora ñocop, ñeññpa' ateñ ot:

Te'pa' concorpana'teñepa'ch allohuen
nemllañoñeñnaneshar.

⁷ Po'mllañoñeñnaneshar ñetpa' añaçpa anarettetenet
ñetcha' sherbenet Yompor. Ñeññó'marña ateñ
eñorena ñocpuet:

Ñerra'm erra nemñayenanet e'ñech poma'yorñecma
erra senet e'ñe ateñ penet ñerra'm mñorr.
Atarr cohuen sherbenet ateñ ñerra'mrrate'
tso' ñeññ atarr cohuen huoretyets.

⁸ Tarraña Puechemerecoppa' ama atteye' oteno.
Ñocoppa' ateñ eñora:

Papa' atarr Partsoþ, ñeñteþcha' chocma amicha'tarettetsa peconaño ñeñt errponaño huen. Ñama ñeñt atto þa'mcha'tarettena þapa' e'ñe pocte' es peþa'yenanet.

⁹ Ñama ñeñt e'ñe pocte' nenten napa' ñeñtña atarr þocshatene'. Ñama ñeñt ama pocteye' nenteno napa', þapa'cho'ña ñeñt atarr petsena'ten. Ñeñto'mar napa' ñeñten Peyomporer pepenen, ahuo't atarr nanac nocshaterrep. Atto atarr þocshena þapa' ello pemtana'tueñ allohu en po'potantañ ñeñt nesherba'yene' ñamet.

¹⁰ Yomporpa' alla eñorerrerr Puechemerecop, ñeñtpa' atet otererr:

Partseshacha' pa yeþhcatus' ahuat pats, e'ñe echarr þorratue. Enetpa'cho'ña e'ñe pehuamenco tecma peyeþhcatus'.

¹¹ Ñeñt e'ñe peyeþhcatus' ñeñtpa' huayerrcha' e'ñech chenca'huerra esempo, tarraña þapa' ama arromiañeshayayape ama't e'ñe errponaña. Allohu en ñeñt peyeþhcatus' ñeñtpa' e'ñech mellasha'tua e'ñech atet pena ñerra'mrrate' shetamuets ñeñt atarr amyllasha'tna.

¹² Atetcha' peperr peyeþhcatar atet ñerra'mrrate' shetamtsoshe'm ñeñt o' mellasha't. O'ch a'metatse'chet o'ch huapore'chet allempo chorrenet po'poñ ñeñt atarr cohuen emarr. Tarraña þapa' atterapach errponaño huen. Atto þocrrena þapa' ama't ahuañapa' amach ahuañañatterro.

13 Po'pocheño Yomporpa' alla oterranerr Puechemer, ñeñt̄pa' atet̄ och:

Te'pa' o'ch alla þanorruearr arr necohuenrot allcha' pepartsotapretuerrna. Esempo-huañencha' allohuen ñeñt̄ pe'moñe'tene' o'ch e'ñe na'mchechuerranet attochña pomnaren peþohuerranet.

Tarraña mellañoñeñnaneshasha'ñapa' ama atteye' oche ñeñt̄ atet̄ otan Puechemer. (Ñeñto'mar yeñoteñ Yompor Puechemer ña atarr sherbets, ello metana'tuenan allohuen mellañoñeñnaneshasha'.)

14 Yeñoteñ allohuen mellañoñeñnaneshasha'pa' añecpa allsensareñtenet atet̄ ñerra'm Yompor Puecamquëñ, ñetcha' sherbenet Yompor. Attochña ñetcha' yenpuenet allohuen ñeñt̄cha' a'queshpataretterra.

2

*Amach atta es yepchatsto esheccha'
ya'queshpataretterra*

1 Te'pa' atto o' yeñoterrñañ Yompor Puechemer atto atarr nanac partsoten ñeñto'marepa'chña te'pa' elloc yema'yochrerra o'ch ye'mñoter e'ñe poctacma ñeñt̄ atto o' ye'muerrñañ po'ñoñ. Ye'mñoterrepa'chña e'ñe cohuen te't acopoteñpa' ñato'rraña o'te' alla yepserrñañ ñeñt̄ atet̄ o' yeçhaterrey Yompor Puechemer. **2** Tarro'mar yeñoteñ Yomporpa' ama puenesho po'ñoñ ñeñt̄ atto eñorana'tanet ahuat. Tarro'mar allempo ñeñt̄ ama e'mñotaye ñeñt̄ atta aþpare'te'pa' e'ñe tsa'tatuanete't allohuen ñeñt̄ allpon e'ñe pocte' ent ña. Ama't añ ñoñets ñeñt̄ orrtat

po'mllañoteñrenesha' chocma tsa'tatanete't
 ñerra'm esempo atpare'tenet ñeñt ñoñets.
 3 Ñeñto'marña yapa' yeñoteñ ñerra'm ama
 yeñnoterrñañe e'ñe ña Puechemer, yañapa'
 erroñenotuachñaca'yeña yequeshperrate'ña
 ñerra'm atta ama es yepcheno; e'ñe atta
 eñalleñca'yeña attoch ya'queshpataretterrañ e'ñe
 cohuen. Ñehua, ñenmañpa' Yepartseshar Jesúsn̄a
 serrpare'tatahuet attoch ya'queshpataretterra.
 Allempoña ñeñt e'muene' atet otanet Yepartseshar
 Jesúsn̄, ñetñapa' o' serrpare'tatyet yama attoch
 yeñoch ñeñt e'ñe po'noch ña a'queshpatañtetsa.
 4 Ñama Pomporñapa' ñaña yeñotate' Puechemer
 po'ñoñ ñeñt atet oteneypa' e'ñe po'ñoñch. Ñapa'
 orrtatyesanet po'partsoña ñama po'huamenc
 ñeñtacheñenesha'pa' ama puentareto. Ñama
 ña Puecamquëñoñpa' o' apa'yesey e'ñe
 puesheña'ttsoy errotенcha' muenatey ña ñeñtcha'
 atet yeñorra'yesa ñocop.

*Atto Jesucristopa' e'ñe poctacma acheñetos arr
 patsro attoña e'ñe pa'mo'nasheñ pohuerrey*

5 Te'pa' o'ch noterrserr po'poñonet añ patser
 ñeñtcha' huerrtsa tsapatonet. Ñeñtpa' ama
 mellañoteñneshay'e' noña Yompor ñeñtcha'
 pomnaren perre'. Ñapa' aña na'acheñ ñeñtpa'
 arromñañenesha'. 6 Tarro'mar atet anaret Yompor
 po'ñoñ ahuañoteñ allempo puesheñarrpa' atet otan
 Yompor:

Ama'tacheñaya ama't mamesha ama
 esoyayye, tarraña ña Nomporepa'
 atarrepa't peyerpuenya. Ama't ya

ñeñ̄tey arromñañena'taraya tarraña p̄a
Nomparepa' atarrepa't pemuerenya.

⁷ Ñeñ̄t arromñañenesha'pa' ama tama
ahuamencañeyayeto atet atarr sherben
mellañoñeñnanesha'. Tarraña ñeñ̄tpa'
mamecpa atet pemnach. Tarraña ama't
atteñpa' elloña o'ch alla pecohuentater atet
ñerra'mrrate' esempo o'ch net ñeñ̄tcha'
am̄cha'tareñtertsa, allempopa' o'ch nachet
po'choyo'm ñeñ̄t atarr cohuen.

⁸ Ñeñ̄tpa' tarro'marña atet pene' arromñañena'tar
allochñapa' attoch e'ñe pomnaren penan al-
lohuen ñeñ̄t allpon es peyeçhcatua. Ar-
rpa' allohua atet oten ñoñets ñeñ̄t ahuañoteñ
anaret.

Ñehua, ñeñ̄t ñoñets all oten arromñañena'tar
ñeñ̄tcha' e'ñe pomnaren perre' allohuem, ñeñ̄tpa'
añca'yeña oteneyp allohuemacop ñeñ̄t erraparen
eñall; amach eñalleña ama't e'ñe pañrra ñeñ̄tcha'
ama pomnaren perreto. Tarraña ama't atet
oteneñ ñeñ̄tpa' amaña yentera' allempoch
pomnaren es perr arromñañena'tar, tarro'mar
ama çherra' allempoch etsoterra ñeñ̄tecop
anaret. ⁹ Tarraña e'ñe yeñoteñ puesheñarr
ñeñ̄t arromñañecoptartotsa ñeñ̄t atet p̄ostsa
ñeñ̄tca'yeña Jesú. Allempo acheñetos arr
patsro Pomporña muenate' amach tama
ahuamencañoso atet atarr ahuamencañena
mellañoñeñnanesha'. Tarraña ñeñ̄tpa' mamecpa
atet muenach attoch e'ñe arromñañecoptartosa
arr patsro. Ñeñ̄tpa' añecopña atet p̄a attoch
mueroçhtosa o'ch rromos allohuemacpay ñeñ̄tey

arromñañenesha'. Yompor e'ñe puemuereñoñey ya attoña muenatan Puechemer o'ch rroma yocop. Ñeñto'marña Pomporpa' o' alla atarr cohuentaterran Puechemer allempo o' alla ner ñeñtcha' atarr amcha'taretertsa.

10 Ñehua, Yomporpa' yeçhcatan allohuen ñeñt eñalleyetsa. Ñama allohuenpa' tarro'mar yeçhcature attoch cohuentateññañet ña. Ñama ñapa' añ muenen shonte' ñeñtcha' e'ñe puechemeresha' perr ñeñtcha' cohuentapreterraya ña. Yomporpa' e'ñe pocte' enteñ o'ch muenatan Puechemer attoch mueroçhtateñacheñenesha'. Attochña e'ñe etsotatoñ Puechemer esheccha' a'queshpáterrana allohuen ñeñtcha' puechemeresha' perr, attochña e'ñe ahuanerranet allcha' cohuentapreterrñañet Pompor. **11** Ñehua, Puechemer ñeñt Jesús, ñapa' a'cohuentatanacheñenesha' Partsocop, attoña e'ñe e'shamñpesuanet po'chñar. Te'ña ñeñtay a'cohuentatuaretey ñama ñeñt ya'cohuentaterre' ñeñtpa' ñeñtña e'ñe ñeñtene'tarecmay tarro'mar ñeñtara Yompor yepen ñeñt Pompor pen ña. Ñeñto'marña Jesúspa' ama puepencñoñeye' pa'mo'nasheñ penye. **12** Yeñoteñ ama penquënyo tarro'mar Yompor po'ñon ñeñt anaret ahuatoteñ ñeñtpa' atet oten ñerra'mrrate' Puechemer otets: Napa' neserrpare'tachcha' nemo'nasheñnesha' atet e'ñe cohuenare' es peþa'yen þa. E'ñe naçhoteñóþep þapa' chocmach na'ye'choçhtatonap all apçhena allohuen masheñneshaçhno.

13 Yompor po'ñon ñeñt aquellcaretpa' atet oterrerr

ñerra'mrrate' Cristo o' alla oterrerr:
 Napa'cho'ña neyemteña Yompor.
 Ñama atet oterrerr Cristo:
 Te' arro'tsenen epan Nompor puechemeresha'
 ñeñt̄ cohuan̄psatenen ña.

14 Ñehua, allohuen ñeñt̄ e'ñe
 pa'mo'nasheñecmuet þannetsa, ñetpa' e'ñe
 ñeñt̄ena'tarecmuet. Ñeñto'marña Jesúspa' e'ñe
 acheñetos attoch pa'mo'nasheñ posey. E'ñe
 arromñañena'tartosa e'ñe atet ñerra'mrrate' ya.
 Ñapa' tarro'marña atet þosa allochñapa' attoch
 rromos. Tarro'mar allempo rromapa' attoña
 puerratañpesuan oneñet̄ po'huamenc atto atarr
 am̄cha'nochtana'teney allempo yerromuen.
15 Ñeñtpa' Jesúsña a'huañatañpesuose' ñeñt̄
 ama't cheshoteñ chocmach yem̄cha'ten atto
 yerromuen, ñeñtpa' atarr am̄cha'nochen yenteñ.
16 Ñehua, yeñoteñ ama mellañoñenaneshay'e
 llequenoña Jesús ñeñt̄cha' yenpos arr patsro.
 Yaña llecosa ñeñt̄ey arromñañeneshay ñeñt̄ey e'ñe
 po'ñoçh po'mrenñey pen Abraham; ñeñto'marña
 ñapa' mueneñ o'ch yenposey. **17** Ñeñto'marña
 ñocoppa' e'ñe poctoña o'chacheñetos, o'ch e'ñe
 attetos ñerra'm ya ñeñt̄ey pa'mo'nasheñnesha'
 pen. Allochñapa' e'ñe puelcapreteñotey ya
 ñeñt̄ey e'ñe pamo'ts penpa' e'ñech cohuen
 a'poctaterrey Partsesho. Attoña ñapa' chocma
 e'ñe cohuen sherbenan Pompor atet ñerra'mrrate'
 ñeñt̄ corneshatyets Partsocop. Ñapa' e'ñe
 po'ñoçh Pa'mcha'tareter peñ allohuen ñeñt̄
 cornaneshatyets Partsocop. Ñeñto'marña ñapa'

e'ñe ña tsa'tuerraya allohueneyacheñeneshay yo'chñar allempo ashataretta e'ñe ña po'rras. Attoña e'ñe a'poctaterrnay yo'chñar Yomporesho.

18 Ñapa' atarr mueročhtosa allempo huapoñe'č topateñets; ñeñtpa' attoch a'ypo'ñereñ Pompor. Ñeñtō'marña te'pa' e'ñe puellcapreteñofey ya ñapa' e'ñe eñoteñ o'ch yenpa'y attoch ahuamencat pónay yeyočher allochñapa' amach alla a'puerraterrye topateñets ñeñtcha' allpon yehuapoya yama.

3

*Jesús ñeñt Yompor Puechemer ña metanene'
ama't Moisés atto atarr sherben ña*

1-2 Ñehua, masheñneshacha' ñama nočhaneshacha' sapa' ñeñtes o'sa'cohuentataretterra Partsocop ñeñtes o'čhore'terres Yompor o'ch čhapterres all pue'ntaño. Te'pa' o'ch notas, o'ch sočtage'ch e'ñe cohuen ñeñt atet perrnay Cristo Jesús ñeñt yame'ñerra. Ñapa' atto allsensarettapa' e'ñe cohuen etsotuan ñeñt atet llesense' Pompor. Ñama ñapa' ña Yecorneshar yepen ñeñt atarr sherbets Partsocop allohuenacpay ñeñtey ame'ñenaya Yompor. Ñapa' e'ñe attecma cohuen etsotuan ora allpon ñeñt atet muenach Pomporacheñeneshacop atet pe'čh ñama Moisés ñapa'čho'ña e'ñe etsotan ñeñt atet och Yompor allohuen pueyochreneshacop. Ñehua, allohuen ñeñt pueyochrenesha' pen Yomporpa' ñetpa' pa'paquëll penanet Yompor.

3 Ñehua, yeñoteñ ñerra'm eñall puepahuarr pocoll

ñeñ̄ ūmatenet e'ñe cohuen añcha'ña atarr cohuen yenten ñeñ̄ ūmatene'. Amachña aña cohuen yenteno pocoll ūarro'mar pocollpa' ama ñoñaye' cohuenteno; eñallca'yeña pamo'mte' ñeñ̄ a'cohuentatene'. Attecmach yeñch ñama Jesús atarr cohuen ūarro'mar ñapa' atto ame'ñatana shonte' ñeñ̄cha' pueyochrenesha' pa' Pompor attoña ūmatosan ñama pocoll ñeñ̄ atarr cohuen ñeñ̄cha' pa'paquëll pen Pompor. Moiséspa' amachña ñañeña atarr cohuen yenteno ūarro'mar ñapa' ama ñaye' ūmataye ñeñ̄cha' pa'paquëll perr Yompor.⁴ Ñehua, yeñoteñ allohuen pocollpa' ama ñoñaye' yeçhquëno; çhocmaca'yeña eñall ñeñ̄ yeçhcatene'. Ñeñ̄ yeçhcate' esocmañen ñeñ̄ eñalleyetsa ñeñ̄pa' Yomporña yeçhcatuahue'.⁵ Añña Moiséspa' e'ñe cohuen etsotan ñeñ̄ atet yeçhya Yompor; ñeñ̄pa' o'ch es eñotatysesanacheñenesha' ūarraña ñeñ̄pa' toma'nteñtsa. Tsapatonetña Yomporpa' o'ch eñotaterranet ñeñ̄ e'ñe eñotoçhen. Ama't e'ñe cohuen etsotenaneñ Moisés allohuenacop ñeñ̄ pa'paquëll pen Yompor allempo, ūarraña ñeñ̄ atto sherbenan Yompor pa'pacollopa' ñapa' atta pueñaña peñ Yompor. Amaña Puechemereye'ña peñ. ⁶ Ñapa' aña'yeña Puechemer pen Cristo ñeñ̄cha' sherberrets tsapatonet allohuenacop ñeñ̄cha' e'ñe pa'paquëll perr Pompor. Ñapa' e'ñe cohuen etsoterran ñeñ̄ e'ñe Pomporcop. Allohueneypa' e'ñe pa'paquëll pohueney Yompor allcha' yeçhena ña ñerra'm allo'nach huomenc yeymuetneña attochña e'ñe yocsheñeshocma yecua'huanom ñeñ̄ o'patatenya.

*Yomporpa' e'ñech cohuen amesaterran
pueyochreshachno ñeñtcha' e'ñe cohuen
ame'ñerraya attoch e'ñe cohuen cosherret*

7 Ñeñto'marña Parets Puecamquëñoñpa' atet
oten all aquellcaret Yompor po'ñoño ñeñtpa' atet
oten:

Ñerra'm se'mueñ Yompor atto ñchore'tenes te',

8 sañapa' ñchochña se'mñoch, amachña ñcha
se'charrtatatsto seyocher. Amach ñcha
sañpare'tatsche atet pe't israelnesha'
ahuat allempo chopeñe'chyesete't amayo.
Allñapa' epaye' atsrre'moçhtana'tyesnete't.

9 All amayo satañneshaññapa' atarr topatnete't
atto'ch eñotnet po'ñocho'te' atsa'tatañen.
Ñetpa' atet pa'yesnete't ama't ñchocma
entyesonete't ñeññ norrtatysesanete't.
Pa'tatsoch ñcharra' charohua entyesonete't
ñeññ ñchocma negatysesanete't.

10 Ñeñto'marña napa' atsrre'moçhen nentysesanet,
napa' atet not: "Ñeññ atet cołape'chenet
pueyoçhro ñieññ ama cohuenayaye ñietpa'
atarr panteñet nocop. Ama añeye'
mueneneto o'ch cołape'chet ñeññ cohuen
nenten na."

11 Atarr atsrre'moçhen nentanete't. Ñeñto'marña
atet not ñiocpuet: "Ñetña po'ñoçh ama't
ahuatapa' amach neçchapaterraneto allcha'
pocsheñeshoñpa' o'te' amesapreterrñetañ."
Ñeñto'marña ñiocpuetpa' atet nena' neñoñ
e'ñie na neso'chño.

12 Ñeñto'marña masheñmeshacha' ñamá
noçhaneshacha' te'pa' o'ch notas samáa, e'ñech

señota seyočhro atet soctape'chyen e'ñe puesheña'ttsos, ñato'pa' amate' cohuenaye' soctape'cheno, ñato'pa' amate' po'ñočhaye' same'ñeñoña Yompor. Ñerra'm po'ñočh atet sepenapa' ñeñtpa' ñeñtach sequečhpaterre' Yompor ama't ñeñt Yomporer ñeñt ama arromñaťeshayaye. ¹³ Sapa' e'ñepa'chňa cohuen soctape'chatanna'tnoma paťe'tets yet tayepa'tňapa' orameň yet allempoteň o' čhore'terrey Yompor. Attochňa so'chňarpa' amach errotenot alla shequërrserro. Attoch amach čha se'charrteno seyočhro allochňapa' amach alla satpare'tere Yompor, ama't e'ñe puesheñarrořesa. ¹⁴ Allo'nepa'chňa e'ñe huomenc yeřpa'nom yeyočher. E'ñepa'chňa yeyočhrocmaňen yeyemteňa Cristo atet yeřpa allempo e'ñe errtey ame'ñenaya. Ñerra'm atetcha' yeyemuetnomá allempopa' yagapapretercha' Cristo ñeñt o'patateňa Pompor.

¹⁵ Ñeñto'marňa o'ch alla neyerpaterrserr ñeñt atet oten Yompor po'ñoñ ñeñt aquellcareť ahuaťoteň, ñeñtpa' atet oteney:

Ñerra'm se'mueň Yompor atto čhore'tenes te' saňapa' čchochňa se'mňoch, amachňa čha se'charrtatatsto seyočher. Amach čha satpare'tatsche ñeñt atet pe't israelnesha' ahuat allempo chopeňe'chyeseteť amayo.

¹⁶ Ñamá te'pa' o'ch neyerpaterrserr ñeñt atpare'tyesayeť Yompor allempo puečhore'teňořpa' eñorana'taneteť, ñetpa' ñeñtareta ñeñtet čha'nmačha'taterr Moisés Egipot. ¹⁷ Ñamá o'ch neyerpaterrserr, ñeñt

atarr atsrre'močhen entyeſe' Yompor ahuať ama't pa'tatsoch čharra' charohua, ñetpa' ñeñtareta ñeñtet atarr ochña'tare'tatsete'. Ñeñto'marña ñet allempopa' e'ñe alla colla'huet amayo. ¹⁸ Ñama o'ch neyerpaterrserr, ñeñt otarettatsa allempo ñetpa' ama't ahuaťapa' amach amnatareterreto attoch pocsheñesho'fetpa' o'te' amesapreteretañ Yompor, ñeñtpa' ñeñtara ñeñtet atarr ałparňattatsete'. Ñeñt atet otarettete' allempo, Yomporña nahuet po'ñoñ e'ñe ña pa'so'chño, tarro'mar ñapa' ama puenesho po'ñoñ. ¹⁹ Attoña yeñotenanet ñetpa' ama't puesheñarro'fetapa' amach eshcaye' čchapueto allcha' yečha'huerretañ e'ñe cohuen pueñmañesha' tarro'mar ñetpa' ama eseshaye' cohuen ame'ñayo Yompor.

4

¹ Nehua, Yomporpa' po'ñočh oteney yečhapcha' allcha' yamesapretera allcha' e'ñe cohuen yocsha'huera Yompor ñerra'm po'ñočhcha' yame'ñera yamña. Tayepa'tňapa' orameñ atet oteney yamña e'ñe yemicha'naño'fpa' yame'ñyepa'ch te't puesheña'tsotesp'a' amate' sečherro samña all. ² Tarro'mar ñeñt ałpare'taye' all amayopa' aserrpare'tatarettetañña cohuen ñoñets Yomporeshot tarraňa ama huenetoňa pałparñet tarro'mar ama't e'metañpa' ama eseshaye' ame'ña'pahuoye' entaye. Yapa'čho'ña o' serrpare'taterryet yamña cohuen ñoñets Yomporeshot. ³ Ñeñteycha' e'ñe po'ñočh ame'ñerraya Yompor ñeñteycha'ña čherrets allcha'

yamesapretera allcha' e'ñe cohuen yocsha'huera Yompor. Ñeñtña ama ame'ñetsopa' ñetpa' amach esesha' čherrtso allcha' coshapreteret Yompor. Ñeñtpa' e'ñe attecma ñeñt atet otareta ahuañ ñeñt ama ame'ñatso. E'ñe atet oteney Yompor po'ñoñ all aquellcareñ, ñeñtpa' atet oten Yompor:

Atarr atsrre'močhen nentaneteñ ñeñto'marña atet nena' neñoñ ñocpuet: "Net po'ñočh ama't ahuatapa' amach nečhapaterraneto allcha' amesapreterrnet allcha' e'ñe cohuen cosha'huerrnetañ."

Attoña ñetpa' amach eseshaye' čherrtso allcha' e'ñe cohuen coshapreteret Yompor. Nehua, ahuañ Yomporpa' ña orrtate' ameseñets e'ñe allempoteñ yečhcatuahuan pats ñaňa enet. Ñeñtña ameseñetspa' atarr coshateney yeyočhrocmañen.

⁴ Tarro'mar all po'ñoñ yeňoteñ atet aquellcareñ, ñeñtpa' atet oten:

O' yečhcatuan Yompor allohuen ñeñt allpon yečhcatyesua, po'cančherrmatñoňapa' o' ames Yompor.

⁵ Tarraña po'pocheño all oterrerr Yompor po'ñoñ ñeñt aquellcareñ, ñeñtpa' atet oten:

Ñeñt ama name'ñenayopa' amach eseshaye' čherrtso allcha' amesapreterrnet attoch e'ñe cohuen coshapreterrnet.

⁶ Ñeñto'mar yeňoteñ ñeñt e'mayeñ ahuañ cohuen ñoňets ñetpa' amach eseshaye' čherrtso allcha' amesaterranet Yompor attoch e'ñe cohuen pueyočhrohuen cosherret tarro'mar ñetpa' ama eseshaye' ame'ña'pahuoye' entaye Yompor. Tarraña ama't atteñpa' yeňoteñ Yomporpa' ama

puenesho po'ñooñ. Ñeñto'marña te'pa' yeñoteñ Yomporpa' atterach e'ñe cohuen amesaterran ama't erra'tsena ñeñtcha' po'ñoch ame'ña'po' enterre', attochña ñetpa' cherretcha' allcha' e'ñe cohuen cosherret. ⁷ Nehua, ñeñto'marña Yomporpa' onañcherran po'poñ po'yeter, ñeñtpa' o' cherr te' esheccha' ama't patantarra acheñpa' o'ch ame'ñeñet. Ñeñto'marña yeñoteñ Yomporpa' ora altera cohueney tarro'mar ama't metuen aton char allempoteñ atpare'chete' all amayopa' o' chap allempo atto eñosatan David. Ñeñtpa' ñeñtara ñeñt o' notuanmas:

Ñerra'm esepoch se'mueñ Yompor atto
chore'tenes sañapa' chochña se'mñoch
tayepa'tña orameñ yet allempo o'
chore'teres Yompor, amachña cha
se'charrtatsto seyocher.

⁸ Nehua, yeñoteñ Josué ahuatpa' e'ñe chapatan israelnesha' puechemerashačhno all patso ñeñt all sechete' ahuatoteñ allcha' yeçhoset. Tarraña ama't chapatanetañ allpa' ama eseshaye' pocsheñeshoñ pueyočhrohuen amesostsoña all. Ñerra'm e'ñech cohuen amesatuerranetañ Josuépa' amach onañcherranñerroña Yompor po'poñ po'yeter attoch coshaterrey e'ñe cohuen yejočhrohuen. ⁹ Ñeñto'marña yeñoteñ te'pa' eñallmeñ ñeñt o'patatenya Yompor ñeñtey pueyočhresha' pen allcha' e'ñe yocsheñeshocmañen yamesuerr. Ñeñtpa' e'ñe atet ñerra'mrrate' allempo ames Yompor ahuat po'cančherrmatño. ¹⁰ Tarro'mar allohuen erra'tsencha' cherrets allcha'

amesaterranet Yomporpa' ñetñapa' amach alla es llecaterrahuete'te; e'ñe pameſeñoſet cohuenpa' e'ñech eñimaterret pueyočhrohuenet ateſ ñerra'mrrate' allempo e'nuan e'ñe poctacma Yompor po'taruas, e'ñe pocsheñeshocma ames.

11 Yapa'cho'ña añepa'chña ye'nen attoch yečherr yamña allcha' amesaterrey Yompor attochña e'ñe yocsherra yeyočhro. Te'ñapa' ama't puesheñarroťeyapa' amuepa'ch alla yaťpare'tere' te't ama yečherro yamña all.

12 Yompor erroň oteneý, po'ñoňpa' atarr ahuamencaň ñeňtpa' ama ahuaňaňaťe. Ñeňt po'ñoňpa' e'ñe ateſ etsotenan ñeňt ateſ muenen ña. Po'ñoňpa' allo čhocma ñerra'mrrate' cochell ñeňt atarr etsotaňtataref emoto'mar. O'ch es yepata' allopa' e'ñech beťosua ora, e'ñech pecha'tam̄pesuoň ama't posapohuen. Ateťca'ye penaňa Yompor po'ñoň e'ñech čhaponaya e'ñe yeyočhro ama't e'ñe yecamquěňohuen, ñeňtcha'ña e'ñe yeňotaterre' ñeňt yeyočhro'tsen ama't ñeňt allpon yočape'chyen ora esocmaňen.

13 Ama't puesheñarroťeya amach errotenoň ye'potam̄pesyoňa Yompor ñeňt yečečcate'. Amaťe' errotenoň ya'nasotam̄pesyoňa, ñapa' e'ñeca'ye entuennayña yeyočher ñeňt ora allpon es yočape'chyen. Ñapa' ñach ya'metatatuerre' allohuen ñeňt allpon yočape'chyen.

Jesúspa' ña corneshaterrets, e'ñe metana'tuerran allohuen cornaneshachno atto atarr sherben ña

14 Ñehua, yeňoteň eňall ñeňt Yecorneshar yepen ñeňt atarr Partseshatets, ñeňtpa' ñeňtara Jesús ñeňt Yompor Puechemer. Ñaňapa' o'

alla čherr allohuhanen pue'ntaño e'ñe all Pomporesho, allña e'ñe cohuen a'poctatennay yocop. Ñeñto'marña yapa'čho'ña allo'nepa'ch yeyemuetneña. Amuepa'chña yequečhpatstere. **15** Tarro'mar Jesús ñeñt Yecorneshar yepen ñapa' e'ñe eñoteñ attoch e'ñe cohuen llecapretenya allempo ama e'ñeye' huomencaye'yenteno yeyočhro. Tarro'mar ñapa'čho'ña attecma huapoñeť allohuhen pa'namen topateñets, e'ñe atet yepena ya te' chocma huennaya pa'namen topateñets. Tarraña ñapa' ama't pa'namen huapoyeť topateñets, ñapa' ama't parrocha ama pano ñeñt ama pocteye' enteno Pompor. **16** Ñeñto'marepa'chña e'ñe yeyemteñot Yompor Puechemer, amach yemcha'nañoſeye' yečhore'teñe Yompor ama't ñeñt atarr partsofets po'canaño. E'ñe puemuereñoſey e'ñech cohuen e'mñoteney, chocmach yenpueney. Ñama ñerra'm esempo huennaya ñeñtcha' yellcatene' ñachña e'ñe ahuamencat yepene'.

5

1 Ñehua, yeñoteñ allohuhen ama't erra'tsena ñeñt pa'mcha'tareter pen ñeñt corneshatyets judioneshacop, ñeñtpa'acheña, arromñata. Ñapa' añecop acrareňta ñach anareňtatsa attoch eñenacheňneneshacop Yomporesho. Allempo es apueňet Yomporpa' ñach anene' o'pono Yompor pa'paclo. Allempo muetsenet payara ñeñt allo sherbeňet Yomporpa' ñach nene' eyarra po'rras allo tsa'tenana pueyochreshačhno po'chñar. **2-3** Ñapa'čho'ña ama huomencaye'

enteno pueyočhro tarro'mar ñapa' arromñaña
 ñeñto'marña ama e'ñe pueyochreshacpayaya
 nenanoña eyarra po'rras; ñeñtpa' ñocpa'naña neñ
 allo tsa'tenana ñama po'chñar Yomporesho. Atto
 ñapa'cho'ña ama huomencaye' enteno pueyočhro
 ñeñto'marña ñapa' e'ñe eñoteñ o'ch llecapretana
 pueyochresha' allempo es pantenet ñet ñama
 allempo yečhcatenet ñeñt sosey enten Yompor
 tarro'mar amaña e'ñe ñeñta neneto pueyočhreto;
 čhocmaña pueseñet Yompor.

4 Ñama yeñoteñ ama't e'ñe puesheñarrapa' ama
 eseshaye' netso e'ñe ñañeña attoch corneshat
 Partsocop. Ñeñtpa' Yomporña čhore'tene' ama't
 erra'tsena puesheñarr ñeñtcha'ña corneshatats.
 Atet pa ñama Aarón, ñapa' Yomporña ne' atto cor-
 neshateñ Partsocop. **5** Cristopa'cho'ña attecma pa
 ñama ama ñaye' otatso, "napa' nach corneshatats."
 Pomporña ne' ñeñtcha' corneshatats attoch yeco-
 huentateññañ. Yeñoteñ Pomporpa' atet cohuen-
 tateñ tarro'mar Yompor po'ñoñ ñeñt aquellcaret
 ahuañ ñeñtpa' atet oten:

Papa' Nechemerep, te'ñapa' o'ch neñotach
 acheñenesha' po'ñočh papa' Nechemer
 nepeneñ tarro'mar te'pa' o'ch nenañ pach
 amčha'tareñtertsa.

6 Po'poñ aquellcaretopa' all otererr:

Papa' attoch pecorneshaterrpa' ñeñtpa' amach
 huañerro ama't e'ñe errponaña. E'ñe atet o'
 pa'llsensareñterra atet ñerra'm Melquisedec
 ñeñt corneshatatseñ ahuañ.

7 Allempo allo'tsenmeñ Cristo arr patsropa'
 ma'yochamñpsa ñañeña. Ma'yochamñpsa e'ñe

huomenc puellquëñesha'. Pueya'chpeñesha' enaman Pompor ñeñt atarr ahuamencatesha' attoch a'queshpach puerromueñot. E'ñe pomcha'na'teñotan Pomporpa' atet och: "Amach añeye' atet peþatstono ñeñt nemnen na; añcha'ña atet peþon ñeñt pemnen pa." Ñeñto'marña Pomporpa' e'ñe e'mñoch. ⁸ Ñehua, Cristo ama't e'ñe Yompor Puechemerpa' ñapa'cho'ña atarr mueroëhta, attoña e'ñe yeðhan attoch e'ñe cohuen e'mñotenan Pompor. ⁹ Atto yeðhan pue'mñoteñpa' ñeñto'marña e'ñe etsotuan ora attoch a'queshpatañta, allochñapa' attoch a'queshpaterran e'ñe poctacma allohuen erra'tsencha' e'mñoterre' ña. ¹⁰ Ñeñto'marña Pomporpa' ne' ñach corneshaterrets Partsocop e'ñe atet corneshate'ñ ahuat Melquisedec.

*Ñeñt ama huomencaye' penaye pueyocher
Yomporecop ña ottena ñerra'm ematoll*

¹¹ Ñeñtpa' orameñ shontemeñ nemneñeñ o'ch notaseñ. Tarraña ama'tcha' notaseñpa' atarr torrapo' o'ch neðchapatonas seyoëchro tarro'mar te'pa' o'huañ tama semne' ama't erra'tsenapa' o'ch se'mñoteñ. ¹² Sapa' ahuatoteñ same'ñenañ ñeñto'marña te'pa' socoppa' añ poctetsañ o'ch seyçhatyeseñ po'potantañeðhno ñeñt allpon shonte' señotyeneñ. Tarraña sañapa' amaña atteye'ña sepeno tarro'mar sapa' teme'ttsen sepalltena o'ch alla yeðchaterrseterr Yompor po'ñoñ ñeñt yeðchatuaset e'ñe ñenmañ ama't ñeñtpa' ama tarrapahuoyaye yocop o'ch yeñoch. Sapa' ama huomencaye' sepeno seyoëcher tarro'mar

sapa' čha sottena ñerra'mrrate' ematoll ñeñt añach orren pachor pomosos ñeñt ama etsotenana' o'ch rran rreñets ñeñt yerren ya. [13-14](#) Ñama yeñoteñ allohuén ñeñt añach pocrram̄ pen pomosos, ñeñtpa' ematolla ama eñotenana' o'ch e'nan rreñets ñeñt chocma yerren. Ñama ñeñt ottetsa ñerra'mrrate' ematollpa' ama eñotenanoña Yompor po'ñoñ attoch pocte' eñch Yompor. Tarraña ñeñt po'ñočh atet enten Yompor ñerra'mrrate' po'nanesha' ñetpa' e'ñech eñotenet ñeñt pocte' enten Pomporet ñama ñeñt ama pocteye' enteno; tarro'mar ñetpa' ahuatoteñ ameñieret Pomporet. Ñeñto'marña ñetpa' allo'na senet etsotnomuet Yompor po'ñoñ ama't ñeñt atarr echarr ñeñtña e'ñe pocrram̄ penet.

6

[1-3](#) Allo'nepa'ch yesen e'ñe yečha'nmue' Yompor poctaþña ama't ñeñt atarr echarr. Allochñapa' yepeñoñ atet muenen ñapa' e'ñech po'n enteneyña Yompor. Ñehua, sapa' o' e'ñe seyčherr ñeñt ñenmañ yečhataset Cristocop, attoch sequečhpahuerrña ñeñt atet seyečhcatyeseñ ñeñt ama a'queshpatañeyaye. Añca'yeña o' ello socłape'cherr cohuen Yomporecop chocma'yeña o' sameñera. O' señoterr ñama ñeñt atet yapatarettena Yomporecop, ñama atto chocma yenen yot ñesheto ñeñt ameñatsa. Ñama o' sa'yčhataretterra attoch yetanterra ñama attoch esempohuañenpa' ya'craetterrach allohueneý erroñencha' entyesuerrey Yompor, ñato' cohuent'e yepa'yen, ñato' amate' cohuenaye' yepeno. Ñeñt

o' yečhatuanmaset ahuañočeñ Cristocoppa' amachña ñeñtaña alla seserrpare'tame'terre'če. Añcha'ña allo'nepa'chña yesen eñotnomue' po'poñečhno Yompor počtaþña ñerra'm Yomporcha'yemnate'.

4-6 Tarro'mar yeñoteñ ñerra'm esesha'o' čhapoña pueyočhro ñeñt cohuen enten Yompor ñaňma ñerra'm o' agapan Yompor ñeñt apueney attochña yapa' corretsayach tayočeñ errponohuaňen pue'ntaño, ñaňma ñerra'm o' agapan Yompor Puecamquëñ ñaňma ñerra'm čho yomenana Yompor po'ñoñ ñaňma ñerra'm eñotuanman Yompor po'huamenc ñeñt ama ahuaňaňaťeyaye, tarraňa ñerra'm o'ch alla puerrerret, ñetpa' amach erročenoč alla yočape'chaterranete'če attoch cotače'cherret etserra cohuen Yomporecop. Tarro'mar ñeñtacheňerpa' aň toma'ntena ñeñt atarr muenene' o'ch alla corso'tamperranerr po'pocheňo Yompor Puechemer; attoňa o' alla achmare'tererr allo'tsa'yen shonte'acheňenesha'.

7 Ñeñt atet petsapa' o'ch netma'ntacha ñeñt atet pena pats. Nehua, allempo e'ñe cohuen huapotamþsatenan Yompor pats ñerra'm o'ch chepares pa'namen narmetsočhno ñeñtcha' coshatene' pamo'mte' ñeñt nare'tene', Yomporňa čhocma ačtorene' ñeñt pats esheccha' pa'namen yečhquëtsa all. **8** Tarraňa ñerra'm aňa cheparsats pa'namen ajačhno ñeñt ama cohuenayaye, ñeñtňa patspa' amach es sherbeno. Yomporeshotpa' arrnomarečterrach attoch a'poyarečterra.

*Atto e'ñe yejemteňoč Yompor čhocmach yecuen
ñeñt o'patatyenya*

9 Tarraña ama't atet notensoñ masheñneshacha' sa ñeñtes atarr nemorrentena, napa' necuenes ñaña nefiotenes sapa' o'ch alla sorrtatyerr e'ñe cohuenare' ñeñt atet orrtatyen allohuen ñeñtcha' queshperrtsa. **10** Tarro'mar Yomporpa' e'ñe pocte' es pennay. Ñapa' chocma po'ñoch entenes ñeñt atet setorra'yena ñocop ñaña atto semorrenteññaña allohuen ñeñt pueyochresha' pen Parets. Ñeñto'mariña e'ñe same'ñeñot ñapa' e'ñe cohuen seyenpa'yeñ allohuen masheñeshachno ñeñt pueyochresha' pen ña, ama't teme'ttsen attecma sepena. **11** Añña atarr nemnen ama't allohuenespa' allo'nepa'chña sesen orrtatyesnomue' ñeñt cohuen enten Yompor, e'ñechña socsheñeshocmañen sorrtatyesuanom allohuen ñeñt cohuen enten Yompor e'ñe atet socsheñot chocma seyenpa'yeñ ñeñt pueyochresha' pen Parets. Attoña e'ñe seyemteñot Yompor secuen ñeñt o'patatenya. **12** Attochña amach ña seçllatsto Yomporecop, añcha'ña sepena samña ñeñt atet ña'yena po'potantañeñhno ñeñt pame'ñeñotet Yomporpa' ama't erroñuaneno'tsa'yenet ñetpa' chocma ahuanta'huaneñet. Attochña e'ñe o'patueññañet Yompor ñeñt oteneý Yompor ñeñtcha' aphuerrey.

13 Tarro'mar yapa' yeñoteñ chocmach aphuerrey ñeñt atet oteneý. Ñehua, yeñoteñ Yompor ahuatpa' atet otane't Abraham ñeñtcha' atet perrñañ tsapañone't po'mrenñecop. E'ñe ñañeña pa'so'chño atet otan Abraham tarro'mar ama eñalle po'poñ ñeñt atarr ahuamencatesha' atet ñerra'm ña allcha'

a'poctatan po'ñoñ. ¹⁴ Ñeñto'mar e'ñe ña pa'so'chñó atet otan Abraham: "Na po'ñoçhpa' atarrcha' nebensare'tam̄psaã attochña na'm̄raterrnaþ ñeñtcha' pemreneñ peperr." ¹⁵ Ñeñto'marña Abrahampa' e'ñe pueyemteñoñ Yompor po'ñoñ atet oteñ ñapa' ama queçhpueñé, çhocma cohuenan ñeñt atet oteñ Yompor. Ñeñto'marña Abrahampa' po'ñoçh agapater Yompor ñeñt atet ocheñt ahuatoteñ. ¹⁶ Nehua, yapa' yeñoteñacheñ arr patsro ñerra'm es muenenet o'ch es otenet e'ñe po'ñoçh, ñetpa' o'ch otenet e'ñe añ pa'so'chñó ñeñt atarr ahuamencatesha'. Ñerra'm atet penetpa' attoña eñoteñet ñeñt ñoñetspa' o'anareñta, o'huañcha' allo'na otnare'tanna'tnenet po'ñoñ'o'maret. ¹⁷ Yomporpa'cho'ña e'ñe attecmanan po'ñoñ e'ñe ña pa'so'chñó tarro'mar ñapa' mueneñ o'ch eñotateney amachña a'po'poñetañperryeña po'ñoñ, allohueney ñeñtay o'patatena ñeñt atet oteney o'ch apuerrey. ¹⁸ Ñeñto'mar yeñoteñ Yomporpa' e'ñe epoch eñotateney e'ñe po'ñoçh atetcha' perrnay, ñama Yompor po'ñoñpa' ama çhoye' shequënye. Ñeñto'marña e'ñe yeyemteñoñ ñapa' yeñoteñ po'ñoçhpa' a'queshþatuerreycha' ñeñt atet oteney. Ñeñto'marña yecueñ ama't allohueney ñeñtay e'nene' ña ñachña ya'queshþatuerre'. ¹⁹ Ñeñto'marña yeñoteñ ñeñt yecuen ya o'ch a'queshþatuerrey Yompor ñeñtpa' e'ñe po'ñoçh, ñeñt ama ahuañañayaye. Ñeñto'marña yeñoteñ e'ñe yeyemteñoñ ña yecamquëññapa' e'ñe cohueno'tsen amach erroñenoñ chenquërro.

Yeyemteñoñ Yompor ñeñtpa' añ toma'ntena ñeñt orrene' barco oño ñeñt otenet ancla. Allochña barcopa' amach errotenoñ chenco. Ñeñt atto yeyemteña Yompor ñeñtña anclatetsña yecamquëñecop ñama ñeñtpa' e'ñe po'ñoch allo e'ñe huomenc orrena yecamquëñ tarro'mar ñeñtpa' Yomporeshot anaret e'ñe allohuhanen ñeñt allo'tsen Parets pa'pacollo pue'ntaño, e'ñe allohuhanen allo'tsen besom allo yottampeññañet Parets po'poner. Allca'yeña anareñtenaña ñeñt toma'ntenaya ancla atto ya yeyemteña Yompor. ²⁰ Tarro'mar e'ñe all Partseshopa' allña o' cherrña Jesús ñeñt o' otampperrya allcha' a'poctatosnay e'ñe cohuen yocop Pomporesho. Allñapa' o' corneshatuerr Partsesho. Atto o' corneshatuerr ñeñtpa' amach huañerro ama't errponaña. E'ñe ateñ o' allsensaretterra o'ch corneshatuerr fierra'mrrate' ateñ corneshateñ ahuat Melquisedec.

7

*Jesúspa' atarr cohuen corneshatos Partsocop
ateñ corneshateñ ñama Melquisedec Partsocop
ahuat*

¹ Nehua, te'pa' o'ch alla neyerpaterra ñeñt ateñ peñt ñeñt corneshatatseñ ahuat ñeñtpa' añ pa'so'cheñ Melquisedec. Ñapa' ñeñt corneshatatseñ Partsocop ñeñt atarr partsolets. Ñama ñapa' ñeñt amcha'tareñtatseñ all anetso ñeñt pa'so'cheñ Salem. Allempopa' correna ñama yatañ Abraham. Parrochña Abrahampa' ahuo' allcha' quellarenana' po'potantañechno

ñeñ̄ am̄cha'tareñetyetsa allo'mar. E'ñ̄e a'mchechuahuenaneta'pa' huerra. Allempo err, toñopa' all poctapueñ cornesha' Melquisedec. Allña pocteñpa' allenta bensare'tam̄psapuenan Abraham. ² Ora ñeñ̄ allpon yoram̄psan ñeñ̄ o' quellara'huena'pa' allempoña Abrahampa' aphuenan cornesha' Melquisedec allpon ñeñ̄ Partsocop. Allpon aphueñpa' ñeñ̄pa' ñeñ̄ allpon otenet la décima parte. Ñeñ̄pa' atet ñierra'm es eñall ñeñ̄ yechen ñarrapa'ttsocma, pate'tetsñapa' o'ch yeneñ e'ñ̄e Partsocop. Ñehua, ñeñ̄ so'chñetser Melquisedecpa' añ otenet "ñeñ̄ pompor pen allohuem am̄cha'tareñtechno ñeñ̄ e'ñ̄e pocte' enten Parets." Alloñpa' ñama ñapa' arr am̄cha'tareñtena anetso añ pa'so'cheñ Salem. Ñeñ̄ anetser pa'so'cheñ añ otenet "muechetteñtsompaño" tarro'mar all am̄cha'tareñtena ñapa' ña orrtatene' e'ñ̄e cohuen morrentanna'teñets attoña yeñhenet e'ñ̄e cohuen muechet. ³ Ñeñ̄ Melquisedecpa' ama eñotpahuoyayeña ñeñ̄ pompor pe't ñama ñeñ̄ pachor pe't tarro'mar ama aquellcareñteyaye ñeñ̄ pa'so'cheñ. Ñama ñeñ̄ pa'tañneshañ pe't ñeñ̄pa'cho'ña ama eñotpahuoyaye. Ama't ñama allempoteñ eñalleta Melquisedec ama't ñama allempo rroma ñeñ̄pa'cho'ña ama eñotpahuoyaye. Ñapa' tarro'mar atet pe't añ toma'ntena ñeñ̄ Puechemer pen Parets. Ñeñ̄o'marña atto corneshaten ñeñ̄pa' amach huañerro ama't errponaña.

⁴ Señochepa'ch cornesha' Melquisedec ñapa' atarr sherben. Ama't yatañ Abrahampa' chocma

es apane'ł Melquisedec ateł ñerra'mrrate' ñeñt es yenen ñeñt Partsocop. Añ aphueñ ñeñt allpon yoram̄psan ñeñt o' quellara'huena'. Allpon aphueñ ñeñt ateł ñerra'm cho es yenen Partsocop ñeñtpa' ateł ñerra'mrrate' ñeñt allpon es yechyen e'ñe čarrapa'ttsocma, pate'tetsñapa' o'ch yeneñ e'ñe Partsocop. ⁵ Nehua, yeñoteñ levína'tarnesha'pa' ñeñtēna'tarña anarettatse'ł judioneshacop ñeñtcha' corneshatets Partsocop. Ñocpuetña nanña Moisés po'ñoñ, ñeñtña ñoñetspa' ateł oten ñocpuet: E'ñe pocte' secobreñacheñenesha'. Apa'yenetepa'ña allponapa'tets ñeñt Partsocop, ateł ñerra'mrrate' ñeñt allpon yechyen e'ñe čarrapa'ttsocma, pate'tetsñapa' o'ch yeneñ e'ñe Partsocop (ñeñtara otenet diezmo). Ñeñto'marña chocma cobreñetña pamo'tsesha' ama'ł e'ñe ñeñtēna'tarecmuet, tarro'mar Abrahampa' ñeñtara pa'to' pohueñet allohuinet. ⁶ Tarraña Melquisedec ama'ł ñapa' ama levína'tarneshayaye ñañapa' ello metana'tuenanet ñet tarro'mar ñapa' ama'ł yatañ Abrahampa' agapoñe'ł allpon ñeñtcha' aþ Partsocop. Elloña bensare'tam̄penan Abraham ama'ł Abrahampa' o' otue Yompor ñach bensare'tam̄pse'. (Abrahampa' e'ñe pocte' enteñ tarro'mar atarr ahuamencatesha' entenan Melquisedec.) ⁷ Nehua, yeñoteñ po'ñoçh ñeñt atarr nanac am̄cha'tarettetsa ñapa' ñachña bensare'tam̄pene' po'potantañechno ñeñt ama tama am̄cha'tarettetso ateł ñerra'm ña. Ñeñto'marña yeñoteñ Melquisedecpa' atarr sherben tarro'mar ama'ł am̄cha'taret

Abrahampa' ñapa' ello bensare'tam̄peñ.
 8 Ñeñ̄t yenten arr patsro ñeñ̄t corneshatets Partsocop, ñetpa' arromñañota atet penet. Tarraña ama't arromñañota atet penet chocma agüeññañetacheñenesha' ñeñ̄t apa'yenet Partsocop. Melquisedecpa'cho' ñaña agapaye't ñeñ̄t apa'yesete't Partsocop. Tarraña Melquisedec ñeñ̄t atet anare't Yompor po'ñoño ñocop ñeñ̄tpa' atet oten ñerra'mrrate' ñapa' ama arromñañeshayaye. **9-10** Ñehua, ñato' o'ch yot Leví ama't allohuen pue'ñaresshohuen, ñeta'naña agapam̄psanet Melquisedec ñeñ̄t allpon apueñet Partsocop e'ñe allempocma agapan ñeñ̄t aþ Abraham Partsocop. Ama't ama eñalletena' Leví allempopa' te'pa' o'ch yot ñapa' e'ñe pa'to' Abraham po'chtso'tsen allempo, allempo pocten Melquisedec. Ñeñ̄to'mar te'pa' o'ch yot levína'tarnesha' ñeñ̄t po'taruas pene' o'ch cobranacheñenesha' attoch allpon apa'yenet Partsocop, ñeta'netepa'tña cobra'ña allempo Melquisedec. Ñeñ̄to'marña yeñoteñ Melquisedecpa' atarr sherben, ello metana'tuenan levína'tarnesha' ñeñ̄t corneshatyets Partsocop.

11 Ñehua, yeñoteñ ahuat allempo aparetta israelenesha' ñoñets ñeñ̄t atet anare't, ñeñ̄tpa' añ orrtate'levínesha' ñeñ̄t corneshatyestse't ahuat Partsocop. Tarraña añ ñoñets ñeñ̄t orrtat cornaneshaçhno ñeñ̄fara levínesha'pa' ñeñ̄tpa' amach errotenot a'cohuentaterranetoña Yomporecop. Ñerra'm po'ñoçhcha' a'cohuentatenyeñ amate' eso'mar huapoña Cristo ñeñ̄tcha' corneshatosets ello

ñeñ̄t atet corneshate' t Melquisedec, ñeñ̄tpa' ama atteye' corneshatoso ñeñ̄t atet corneshaten Aarón ñeñ̄tara levína'tarnesha'. ¹² Nehua, yeñoteñ ñerra'm esempo Yomporpa' orrtaterran po'psheñeñ ñeñ̄tcha' corneshaterrets po'poñonet, yeñoteñ añ ñoñets ñeñ̄t atet anaret ñeñ̄t orrtat cornanesha' levína'tarnesha' ñeñ̄t ñoñtsorpa'cho'ña o'ch ña cha po'poñetuerr. ¹³⁻¹⁴ Yeñoteñ Yepartseshar Cristo ñeñ̄ña otenña Yompor po'ñoñ ñeñ̄tcha'ña ello corneshatosets. Yeñoteñ ñapa' ama levína'tareyaye, ñapa' judámereñtsorof eñalleta, ñeñ̄t po'poñ mereñtsor ñeñ̄tara israelena'tar. Ñetpa' ama anareteyayeto o'ch corneshatet Partsocop ñeñ̄t atet anarettá levína'tarneshacop. Moiséspa' ama esoye' sochaneto ñocpuet ama't puesheñarroña attoch corneshatet. Ñama ñetpa' ama't puesheñarroñeta ama eseshaye' tetso altaro allotecma sherbeñet Parets.

¹⁵ Elloña yeñoteñ o' po'poñet ñeñ̄tcha' e'ñe cohuen corneshaterrets tarro'mar allempo orrta Cristo, ñach corneshaterrets atet anarette't Melquisedec. Ñapa' ama atteyaye ñerra'mrrate' atet anarette't levína'tarnesha'. ¹⁶ Atto corneshatos Cristo ñeñ̄tpa' ama añecpayaye attoch allo'na corneshatnen levína'tar ñeñ̄t atet anarettetenet ñocpuet. Ñapa' añecopña corneshaterr Partsocop tarro'mar ñapa' ña atarr ahuamencatesha' ñeñ̄t ama arromñáteshayaye ama't errponaña. ¹⁷ E'ñe Cristocop eñotateney añ ñoñets ñeñ̄t atet anaret Yompor po'ñoño, ñeñ̄tpa' atet oteñ Pompor:

Papa' attoch pecorneshaterrpa' ñeñ̄tpa' amach

huañerro ama't e'ñe errponaña. E'ñe atet o' pa'llsensaretterra atet ñerra'm Melquisedec ñeñt corneshatatse't ahuat.

18-19 Ñeñt ahuatoeñ ñoñets ñeñt atet nonaye't Moisés ñeñtcha' atet yeþohueneñ ñeñtña te'pa' o' huañcha' ye'cua'per tarro'mar ñeñtpa' ama eñalle po'huamenc attoch ñeñtcha' ya'cohuentaterre' Yomporecop, e'ñe orrena atarr yetorra'yese't. Tarraña te'pa' o' orrternaya po'poñ ñeñtñapa' ello atarr sherben ñeñtcha' ya'cohuentaterre' Yomporecop esheccha' yeþherr Yomporesho ñeñtcha'ña atarr yeyemterraña te'.

20 Yomporpa' e'ñe ña pa'so'chño nan po'ñoñ allempo llesensan Cristo ñach corneshaterrets erponañoohen. **21** Po'potantañeþhno ñeñt corneshatyets ñeñtara levína'tarnesha' allempo acornesha'tareþetyeset ñetpa' ama Yomporeye' nahueto pa'so'chño attoch corneshatyerset. Tarraña Cristo allempo allsensareta attoch corneshatos, ñeñt eñoraten Yompor Cristocoppa' ñeñtñapa' atet oten: Yompor o' nan po'ñoñ e'ñe ña pa'so'chño ñeñt'o'mar amach errotenoñ a'po'poñetuerrano po'ñoñ; (ñeñtpa' atet ot Cristocop): "Papa' attoch pecorneshaterrpa' ñeñtpa' amach huañerro ama't e'ñe errponaña. E'ñe atet o' pa'llsensaretterra atet ñerra'm Melquisedec ñeñt corneshatatse't ahuat."

22 Ñeñt'o'marña Jesúspa' eñotoëhtaterrnay po'ñoçh atto Yomporpa' a'poctaterrnay etserra ñeñtña atarr sherbets, ello o' metana'tuerran ñeñt atet a'poctatonaye't ahuat. **23** Ñeñt ahuatoeñ

cornaneshačhno ñeñtara levína'tarnesha', ñetpa' epaye' shonta'nmuet tarro'mar chocmach rromayesete' attoña o'huañcha' allo'na corneshatyesnenet. Ellopa' o'chcho' huapa po'psheñeñ ñeñtara levína'tar ñeñtcha' alla corneshaterrets. Ñeñto'mar epaye'shonta'nma ñeñt corneshatyesnomtse' ahuatoteñ. ²⁴ Tarraña Cristopa' errponañoahuenga' corneshatter tarro'mar ñapa' ama arromñaťeshayaye. ²⁵ Ñeñto'mar Cristopa' ña eñotene' attoch chocma a'queshpatenan allohuén ñeñt e'nene' Yompor ñerra'm e'ñe pueyemteñotet ñia, tarro'mar ñapa' chocma allo'tsen Pomporesho allecma a'poctatennay ñeñt e'ñe cohuen yocop. ²⁶ Ñeñtpa' e'ñeca'ye pochte'ña yocop o'ch yechen Yecorneshar ñeñt Cristo tarro'mar ñapa' e'ñe cohuen Parets, ama eñalle po'chñar ama't mamesha ñeñtcha' a'sosyatene'. Ñapa' o' sohuanerran allohuén ñeñt cołene' sosya'tsañ o' alla čherr allohuánen Yompor pue'ntaño allña partsotapretenan Pompor. ²⁷ Ñapa' ama atteye' poso ñerra'm po'potantañ cornaneshačhno ñeñt ahuatoteñ. Ñet pałe'tets yetpa' epaye' muetsete' payaračhno; ñeñt eyarra po'rraspa' alloña peretnatane'ñia cornaneshačhno po'chñar. Ellonetpa' o'ch peretnateñet ñama allohuénacheñenesha' po'chñar ñeñtara eyarra po'rraso. Tarraña Cristo ñapa' e'ñe parrocha shatan e'ñe ñañeña po'rراس allohuénacop ochňartsocop allempo rroma yocop e'ñe ña puemnenñot; ñeñtpa' attoña tsa'tuerrnaya yo'chñar Pomporesho. ²⁸ Moisés ñeñt ateñ nan

ñoñets ahuañpa' ñeñtpa'acheña na'yes ñeñtcha' corneshatysets atteta ñerra'mrrate' ya ñeñtey ama cohuenacmaye' es petso. Tarraña allempo met allpon charpa' allempoña Yomporpa' o' alla nerran po'ñoñ e'ñe ña pa'so'chño. Allempoñapa' nerran Puechemer ñeñtcha' corneshaterrets ñeñt e'ñe cohuenare' es ña'yets Partsocop; ñeñtpa' amach huañerro ama't errponaña. (Ñeñto'marña Cristopa' e'ñe etsotuan ñeñt nanac sherbets.)

8

Jesúspa' ña a'poctatañterrtsa e'ñe etserra yocop

¹ Ora allpon ñeñt o' notuanmas ñeñtpa' e'ñe po'ñoñ atet notenes: ñeñt atto atarr sherben Cornesha' Cristo te'ña ñapa' o' alla anorruerr Parets po'cohuenroñ all anen po'conaño all pue'ntaño. Allñapa' o' alla partsotuerr ñama.

² Allñapa' o' atarr sherba'huerr e'ñe allohuhanen Parets po'prahuo all e'ñe po'ñoñ allo'tsen Yompor. Ñeñtpa' ama atteyaye ñerra'm patso'mar puerhua' ñeñt tomaten acheñ. Allpa' Yomporña tomatene'ña po'prahua' e'ñe ña pue'ntaño.

³ Yeñoteñ allohuuen ñeñt corneshatets Partsocop, ñetpa' añecopña anareettenet attoch ñetcha' es apuenet Yompor ñama ñetpa' o'ch muetsenet payaraçhno Yomporecop attoch peretnatenet po'chñaret. Ñeñto'marña Cornesha' Jesús, ñocoppa'cho'ña e'ñe pocte' o'ch es apan Pompor. (Ñeñtpa' aña apuerran Pompor e'ñe ñañeña po'chets attoch rroma yocop.) ⁴ Ñehua, ñerra'm ñapa' allo'tsenaraña aña patsrop'a ama't mamesha amate' pocteye' enteññeña ñeñt cornaneshatyets

añe patsro, tarro'mar ñetpa' añach e'ñe cohuen entenet o'ch es apueñet Yompor ñeñt e'ñe atet nanete't Moisés po'ñoñ. ⁵ Ñeñto'marña yeñoteñ ñeñt atet sherbenet ñet ñeñtpa' atta toma'nteñet ñeñt atto po'ñoch Cristo e'ñe cohuen sherben Parets po'prahuo ñeñt pue'ntaño'tsen. Añach sherbenet ñeñt attema'ttetsa ñeñt e'ñe po'ñoch atet muenen Yompor. Yeñoteñ ñeñtecma sherbetet tarro'mar ahuat allempo Moiséspa' ahuo'ch tomataneñ ñeñtcha' po'prahua' pa' Parets arr patsro, all aspeno Yomporña gate' ñeñt toma'ntenaya e'ñe ña po'prahua' ñeñt pue'ntaño'tsen. Allempoñapa' atet otan Moisés: "Po'ñoçhp'a' e'ñech atet peyeçhcaton ñeñtcha' neprahua' neña' añ patsro allcha' yeçhena Necamquëñ." Arrpa' allohua atet otan Yompor Moisés. ⁶ Tarraña Cornesha' Cristo te' atto sherberr all pue'ntaño, ñeñtpa' e'ñe po'ñoch poctacma cohuen. Ello metana'tuenan ñeñt atet sherba'yese't ahuañoteñ cornaneshaçhno arr patsro. Tarro'mar te' ñeñt atet o' a'poctaterrnay Pomporeshopa' ñeñtña e'ñe poctacma cohuen yocop, tarro'mar añ a'poctateñetspa' pa'namen otaney ñeñtcha' atet perrnay coshateñtso.

⁷ Yeñoteñ ñerra'm e'ñe cohuen a'poctatyeñet ñeñt ñenmañ allempopa' amach palltenañe o'ch alla a'poctaterryeterr e'ñe ello etserra. ⁸ Yeñoteñ ñeñt ahuañ a'poctateñetspa' ama e'ñeye' cohuen yenpa'ye'te tarro'mar allempo Yomporpa' ama pocteye' entane'te israelnesha'. Tarro'mar po'ñoñpa' atet otan ñeñt aquellcareñt ñeñtpa' atet ot Yompor:

Chapcha' allempoch nenererrr po'poñ
neñoñ israelena'tarneshacop ñama
judána'tarneshacop, ñeñtpa' allochña
na'poctaterranet e'ñe cohuen etserra.

9 Ñeñtpa' amach atteyaye ñerra'm ñeñt
atet na'poctatanet ñenmañ pa'tañneshañ
allempo nerraneta' Egiptoñ e'ñe cohuen na
nehuamencoñ. Tarro'mar allempo ñetpa'
ama atteye' poneto ñeñt atet nenanet
ñeñtcha' a'poctatahuetañ. Ñeñto'mar
napa'cho'ña atta na'ypo'ñanet. Ñeñtpa'
atet ot Yompor allempo.

10 Allempoñapa' o' alla oterrerrr Yompor ñeñtara:
Esempohuañenpa' o'ch alla na'poctatererr
po'poñ ñeñt israelena'tarneshacop.
Ñeñtpa' atetcha' neperranet allempo
esheccha'ña nechapaterranet neñoñ
e'ñe ñet pueyoçreto, ñeñtpa' ñato'
o'ch netma'ntacha atto neñoñpa' o'
aquellcareterret e'ñe ñet pueyoçreto
ñeñtcha' cołape'chaterrahuetña e'ñe
cohuen. Allempoña po'ñoçhpa' e'ñech
Po'yomporer pernet, napa'cho'ña e'ñech
neyochrenesha' neperranet ñamet.

11 Ñama allempo allohuenetpa' e'ñech
eñotuerrnanet ñeñtcha' atet
noctape'chaterranet cohuen pueyoçreto.
Allohuenetpa' e'ñech attecma eñoterrnet
pomporneshohuenet ama't ñama
añeñolleshohuen ama't ñeñt atarr
sherberts ama't ñama ñeñt ama esoye'
enteñeto. Ñeñto'marña allempo ñeñt

am̄cha'na'tpo' entetsapa' ama pallteno o'ch yečhatan po'potantañ pamo'ts ama't ñaña pa'mo'nasheñ. Amach esesha' oterrahuete'te te'pa' añ poctetsa o'ch señoter Yompor, tarro'mar allempopa' o'ch e'ñe eñotuerrnet.

12 Ñama napa' e'ñe nemuereñoñanetpa' neþretnerranetcha' po'chñaret, amach alla neyerpuerranete'te po'chñaret. Arrpa' allohua atet ot Yompor ahuat.

13 Ñeñto'marña yeñoteñ ñeñt atto Yomporpa' all oten e'ñe etserra o'ch a'poctaterrey, ñeñtpa' tarro'mar ñapa' o' a'ypo'ñerran ñeñt attoch ñanom a'poctatyeñ. Ñama ñeñt ahuałoteñ a'po'tateñets te'pa' o' a'ypoëñareñterra, ñeñtpa' huañerrcha'.

9

Ñeñt patso'mar Yompor po'prahua'pa' añ toma'ntateññañet ñeñt e'ñe ña pue'ntaño'tsen po'prahua'

¹ Ñehua, yeñoteñ ñeñt atet a'poctatanetañ ahuat Yompor ñeñtpa' echenan ñoñets anaret ñeñtcha' atet sherba'yeset Parets. Ñama arrcha' e'ñe etsotetña ñeñt Yomporecop e'ñe ña po'prahuo, ñeñt puerahua'pa' ama'tacheña tomatene' arr patsro. ² Ñehua, ñeñt puerahuatatse't ahuat ñeñtpa' shetamtsopo'. Ñeñt tomatenet ñehuapoñpa' ñeñt otenet Partsopahuesho allo'tsen all orratenet huerare ñama allo'tsen mesa allecma nenet pan Partsocop. ³ Allohanen allohua ayottam̄psaret besmo po'ppahueñ shetamtsopo' ñeñt otenet, E'ñe Partsopahuesho

Po'ponro. ⁴ Allñapa' allo'tsen altar, enoñapa' allecma a'crratenet tsach puese' ñeñt atarr eñmosaftetsa Partsocop; ñeñtña altar eno'marpa' e'ñe cohuen orotattena. Ñaña allohuhanen po'ppauño allo'tsen tsapot; ñeñtpa'cho'ña eno'marpa' orotaten. Allña añño'tenet mapuettall allo aquellcaret Yompor po'ññoñ ñeñt a'poctat Yompor ahuatacheñeneshacop. All añño'tenet ñaña pajo' orotaten, allña esha'taret coñe't maná ñaña tsapoto allo'tsen Aarón po'carr ñeñt tapa'llatse't ahuat. ⁵ Tsapoto enot all ten epsheña mellanoñema't ñeñt ayeçhcataret ñeñt otenet querubíñ ñeñt toma'ntenaya Parets po'partsoña ñeñt chorrets all. Querubíñ pa'pa'yopa' alloña ca'matenan tsapot enot allot e'tamñpenet tsapot. Allñapa' allecma peretnanete't Yompor po'chñaret. Ñehua, te'pa' o'ch noterrserr po'poñeçhno ñeñt pa'namen atma'ntataret all.

⁶ Allpa' pa'namen añño'taretyetsa ñeñt all puerahuo. Ñaña ñeñt cornaneshatyets Partsocoppa' chocmach be'tosyenet ñeñt all puerahuo ñehuapoñ, allcha'ña etsotayenet ñeñt atet anaret Partsocop. ⁷ Tarraña ñeñt allohuhanen po'ppahueñ Parets po'poner ama eseshaye' be'tetsoña all. Allpa' añach be'tets puesheñarr cornesha' ñeñt pa'mcha'tareter pen po'potantañ cornaneshachaçhno. Ama't ñapa' paterr charpa' e'ñech parrocha be'ten. Ñaña chocmach anman eyarra po'rras alloch peretnenanet Yompor po'chñaret. Ñeñtpa' e'ñe ñocpa'na po'chñarecop ama't ñaña allohuhanenacheñenesha' po'chñarecpuet. ⁸ Ama't ñeñt

ñehuapoñe'tsen puerahua' allecma sherba'yen cornaneshachno ñeñt atet anaret Partsocop, tarraña e'ñe allohuhanen Parets po'ponro añach be'tets ñeñt nanac corneshatets e'ñe ñapuet. Ñeñto'marña te'pa' Parets Puecamquëñña yeñotatene' atto ama atoram̄psareteyayye allohuenacpay attoch yeçchapam̄peña Yompor all partsoten. ⁹ Ñeñt allempopa' aña toma'ntena ñeñtcha' atet cohuen ñosa tsapañonet Cristo allempoch huapa; atet ñerra'm te'ña o' huapa Cristopa' o' etsotua. Tarro'mar allempo all Parets po'prahuo ama't es apuenetañ Yomporecop ñama ama't es muetsayenetañ Yomporecop, ñeñtpa' arepa't a'cohuentatenanoña aña poctañña ñeñt atet sherbenayeñ Yompor. ¹⁰ Tarro'mar ora atet anarettet allempo ñeñtpa' añecpa sherben ñeñt e'ñe po'chtsocpueta ñeñt atet ñerra'm ñeñtcha' rrenet ñama ñeñtcha' orrenet ñama atto apa'yeseteñ Partsocop. Ñeñt orapa' añecpa sherbeñ attoch a'poctatenet po'chets Partsocop. Ñama ñeñtpa' mamecpa anarettta esempohuañenña Yomporpa' orrtaterrnaycha' po'poñ ñeñtcha' ello nanac yesherberre'.

¹¹ Ñeñtpa' e'ñe tarremphua e'ñe etsoterra allempo huapa Cristo, ñeñtña orrtatose' ñeñt ello nanac sherbets te' yocop. Ñapa' atto corneshatospa' o' alla be'tosuerr allohuhanen Partsopahuesho all pue'ntaño ñeñtña ello nanac sherbets Partsocop. Ñapa' e'ñe metana'tuerran ñeñt sherba'yestseñ ahuañ puerahuo Partsocop ñeñt tomaten acheñ arr patsro. Tarro'mar

ñeñ̄ Parets po'prahua' ñeñ̄ pue'ntaño'tsenpa' ama acheñeye' tomatenaye ñama ñeñ̄pa' ama aña patsroye' atomatareteyaye. ¹² Ñama Cristo allempo be'tosuerr allohuhanen Partsopahuesho ñeñ̄pa' e'ñe parrocha be'tosuerr all pue'ntaño. Ñama ñapa' ama añeye' anmo eyarra po'rras — cabra amapa' huacshetoll. Ñapa' e'ñe ñañeña po'rras pomhuerr. Ñama ñapa' e'ñe parrocha pomanña po'rras all ama't allohuen pa'namenacheñeneshacop po'chñarecop. Attoña e'ñe cohuen a'poctatonay attotcha' a'queshpaterrey, ñama ñeñ̄pa' amach ahuañañatterro ama't errponaña. ¹³ Ñehua, yeñoteñ ñeñ̄ atto shellcapechyesane't cornesha' acheñenesha' cabra po'rraso amapa' huaquësh po'rraso amapa' huacshetoll po'tsapñero ñeñ̄ a'poyenet altaro, ñeñ̄pa' attoña a'poctatenan ama't erra'tsenaacheñer po'chets Partsocop, ama't erroteno a'sosyatena Partsocop. ¹⁴ Tarraña ñeñ̄pa' e'ñe po'chtsochaya a'poctatarettenet Partsocop. Tarraña allempo ashatareñta Cristo po'rras, ñeñ̄pa' ellonet añecopña nanac sherbos attoch a'poctaterrnay ama't ñeñ̄ atet yoctape'chyeyeyoçhro. Ñeñ̄o'marña allempoteñpa' amach alla yeyemtererro ñeñ̄ atet yeyeçhcatyen arrpatsro ñeñ̄ ama a'queshpatañeyaye. Añcha'ña e'ñe cohuen yesherben Yompor ñeñ̄ ama arromñañeshayaye. Cristopa' ñeñ̄o'marña ello atarr sherbeney atto pomuerra ñañeña o'ch rrroma yocop ama't ñapa' ama eñalle po'chñar ama't e'ñe mamesha. Ñeñ̄pa' e'ñe Yompor Puecamquëñot

atet p̄osa; ñeñtña Camuecñetserpa' ama ahuañaño.

15 Atto Jesucristopa' ña eñosets yocop attoch a'poctatuerrnay e'ñe cohuen etserra. Tarro'mar allempo rroma Cristo ñeñtpa' añecopña sherben attoch peretna'huerrnay yo'chñar ñeñt o' allpon yeþohuen ahuatoñeñ allempoteñ yocتا'nom ñeñt ñanom a'poctatañtatsañ. Allochñapa' allohueneý ñeñt ey o' ya'hua'ñareñterra o'ch yame'ñera, ñapa' aphuerreycha' ñeñt o'patatenya ñeñt atet oteneý attochña yapa' corretsayach errponohuañen. **16-17** Ñehua, yeñoteñ arr patsro chocma eñall puesheña'tetsacheñ ñeñt atet petsa o'ch quellca'nman ñoñets all oten ñeñtcha' allpon puechatsrechno apa'nman pamo'tsesha' ñerra'm esempoch rroma. Tarraña allempo orameñ correna ñeñt quellquëne' e'ñe ña po'ñoñ, añaña ñeñt o'patatyenapa' amach errotenoñ amnataretteto o'ch yoret e'ñe allempocma. Tarraña ñerra'm esempoch eñoteñet po'ñoñ o' rromuen ñeñt o'patatenahuet, allempoñapa' aparetetyesetcha' ñeñt allpon o'patatareteñet. (Ñeñto'marña yapa' yeñoteñ allempo rroma Cristo atto ashataretta po'rraspa' ñeñt allpon o'patatyenya yamña ñeñtpa'cho'ña e'ñe yocma.) **18** Ñeñto'marña ahuañ allempo ñenmañ a'poctateteñ Partsocop, ama't allempopa'cho'ña o'ch muerset eyarra, po'rrasoñapa' allochña shellcata'tyeset. Ñeñtpa' attoña e'ñe a'poctateteñ po'ñoñ. **19** Ñehua, Moiséspa' atet p̄a allempo. E'ñe eñotatuanacheñenesha' ora allpon atet oten Yompor po'ñoñ ñeñtcha' atet pet, allempoña ñapa' o' yoran

carrnero pue'ch ñeñt e'chomaret tsama'to ñeñtñapa' huanquë' hisopoch puetacro, allotñapa' yoran ñama huacsheñoll po'rras ñama cabra po'rras, tsech epuet oñ. Allña e'choman carrnero pue'ch ñeñt huanquën tsachþo allempoñapa' shellcata'tan allo libro ñeñt all anareñ Yompor po'ñoñ, attoña shellcana'tam̄pesuan ñama allohuenacheñenesha'. ²⁰ Allempoñapa' atet otanacheñenesha': "Añ po'rzas ñeñtpa' alloña Yomporpa' a'poctatennas ñeñt atet nenan po'ñoñ socop ñeñtcha' atet seña." ²¹ Ñama attecma þan ñama puerahua' ñeñt shetamtso' o'shellcapo'ch ñeñtara errasatso. Ñama ora allpon coymechno ñeñt allo'tsa'yen allecma sherbeñet Parets, ñeñtpa'cho'ña e'ñe shellca'ta'tue. ²² Nehua, yeñoteñ ñeñt atet oten ñoñets ñeñt atet anareñ, allohuen es po'rrasochña e'ñe a'cohuentatenet Partsocop. Allohuen pa'namen ñeñt allo'tsa'yenpa' e'ñe autsa allohuen a'cohuentatue atto ashellcana'tareta eyarra po'rraso. Ñeñt'marña yeñoteñ ñerra'm ama es muetseneto attoch shatatoñet po'rraspa' amach eseshaye' aþpretnareñtetso po'chñaret.

Atto amtsareta Cristo yo'chñarecoppa' attoña e'shohuerrnay yo'chñar

²³ Ñeñt'marña yeñoteñ aña patsro puerahua'pa' eyarra po'rrasoña a'cohuentatyenetña allohuen ñeñt Partsocop. Ñeñt puerahua' aña patso'marpa' aña toma'ntena Parets po'prahua' ñeñt pue'ntaño'tsen, ñeñtpa'cho'ña attecma errasatso a'cohuentatarettena allohuen ñeñt allpon allo'tsa'yen. Taraña ñeñt rromats Parets

po'prahuacop ñeñ̄t pue'ntaño'tsen ñeñ̄tpa' añ muenen errasats ñeñ̄t ello atarr cohuen sherbets.

24 Ñeñ̄to'marña Cristopa' ñeñ̄tecopña rrroma. Tarro'mar Cristopa' ama arreye' be'tosuerro ñeñ̄t patso'mar puerahua' ñeñ̄t yeçhcatenacheñ ñeñ̄t atta toma'ntenaya Yompor po'prahua' ñeñ̄t pue'ntaño'tsen. Allña be'tosuerrña Cristo Parets po'prahuo ñeñ̄t pue'ntaño'tsen ñeñ̄to'marña te' ñapa' allo'tsen e'ñe allohuhanen Yomporesho allña torra'huerra cohuen yocop.

25 Ñaña Cristopa' ama atteye' þoso ateñ pena cornaneshachno ahuat. Ñetpa' chocma be'toseteñ allohuhanen Parets po'ponro e'ñe pañe'tets char. Ñaña errasats ñeñ̄tcha' anenet o'pono ñeñ̄tpa' ama ñetoyaye po'rraset.

26 Tarraña Cristopa' e'ñe parrochecpa anaret o'ch pomuerra ñañeña o'ch rrroma attoch ashataretta po'rras. Tarro'mar ñerra'm ama atteye' anareteñepa' chocmate' rromame'tañ ama't tarrempoteñ allempoteñ e'ñe errte' ayeçhcatarettetsa pats. Tarraña ñeñ̄tpa' ama atteye' þo. Ñapa' añecopña huapa attoch e'ñech parrocha amtsarettalallohuney yo'chñarecop attoch ñachña yahuanmamperre' yo'chñar. Ñeñ̄to'marña huapa allempohuach cherr yet allempoch mellapoterrmocha.

27 Yeñoteñ ama't allohuneyacheñey chocmach yerromuen. Tarraña e'ñech parrocha yerroma allempoñapa' o'ch huerrnaya attoch Yomporpa' eñotatusuerrey e'ñe errotencha' entyesuerrey — ñato' e'ñech cohuen entyesuerrey amapa' ñato' amach cohuenaye' entyesuerrye.

28 Attecma ñaña Cristo e'ñe parrocha rrroma allempo

amtsareṭta allohuen ochñartsocop. Attoña ñapa' e'ñe ahuanmañperrey shontey allohueneý yo'chñar. Ama't amtsareṭtañ ochñartsocop, tarraña Cristopa' allach orrterra po'pocheño. Allempoch huerra po'pocheño pa' po'cohueneño amach añecpaye' huerro o'ch alla rromuerrerr ello ochñartsocop. Añecopcha'ña huerra po'pocheño o'ch e'ñe a'queshpātuaerran allohuen ñeñt chocma cohuene' ña.

10

¹ Ñeñtō'marña yeñoteñ Moisés po'ñoñ ñeñt atet anaret ahuat judioneshacop, ñeñtpa' ama e'ñeye' cohuenteno ñeñt atet cohuentena te' ñeñt orrtatosnay Cristo. Añ ñoñets ñeñt atet anaret ahuat ñeñtpa' aña toma'ntena ñeñtcha' e'ñe po'ñoch cohuenetuerrtsa ñeñtcha' orrterrtsa tsapatonet. Ñeñtō'marña añ ñoñets ñeñt atet anaret ahuat ñeñtpa' amach erroñenot a'cohuentatanoñaacheñenesha' ama't puesheñarra ñeñt muenenayeñ o'ch yemtenanañ Yompor. Ama't chocma muetsa'yesetañey eyarračhno po'chñarecop e'ñe atet oteneñ añ ñoñets ñeñt atet anaret, ñeñtpa' amach erroñenot e'ñe a'cohuentatanoñaacheñenesha'. Ama't pate'tets char chocma muetsa'yesetañey ñeñt Yomporecop, ñeñtpa' ama e'ñeye' a'cohuentatane'teñaacheñenesha' Yomporecop ama't puesheñarra ñeñt muenenayeñ o'ch yemtenanañ Yompor. ² Ñerra'm e'ñe po'ñoch a'cohuentatenaneññaacheñenesha' eso'marte'ñña o'ch alla muetsereterrña po'poñečhno shonte' eyarra. Ñerra'm po'ñoch a'cohuentatenaneñ

acheñenesha' ñeñt atet cołape'chyene' sosya'tsañ pueyočreto, eso'marte'ña alla yerpapa'taterranete'ña po'chñaret ñeñt pueyočro'tsa'yenet. ³ Tarraña po'ñočh epaye' yerpapa'taterranete'ña po'chñaret. E'ñe paťetets char allempopa' o'ch alla muetserreterr eyarračhno añecop ñeñt atto yerpapa'taterraneterr po'chñaret. ⁴ Ñeñto'marña yeňoteň eyarra po'rraspa' amate' errotenot ahuanmamňerryeňa yo'chñar ama't toro po'rras amapa' cabra po'rras.

⁵ Ñeñto'marña Cristopa' atet otosan pompor allempo acheňetos arr patsro ñeñtpa' atet ot: Pa te'pa' ama añeye' pemneno eyarra ñeñt amtsarettetsa p̄ocop ñeñtcha' atarr p̄ocshatene'. Ama't ñama ñeñt es apa'yenet p̄ocop. Ñeñto'marña nocop te'pa' o' peyečhcattuerrnan nechets aň patsrecop ñeñt e'ñe atet pemnen p̄a, e'ñech nechtsoň nesherbosep̄ attoch e'ñe cohuen nocshatenep̄.

⁶ Po'ñočh te'pa' ama añeye' atarr p̄ocshatenaye atto chamuenet eyarra p̄ocop amapa' allempo muetsanatenet eyarra ñeñt po'chñarecpuet.

⁷ Ñeñto'marña Nompore te' napa' o'ch notap̄: "Napa' añecopňa nohuapa arr patsro attoch netsotosnap̄ ñeñt atet pemnen p̄a, ñeñt e'ñe atet anareň peňoňo nocop." Arrpa' allohua atet otan Cristo pompor.

⁸ Ñehua, ñeñt atet ot Cristo arr ñeñtpa' atto Yomporpa' ama añeye' mueneno eyarra ñeñt amtsarettetsa ochñartsocop attoch coshateňet

ñā. Ama't ñañā ñeñ̄t es apa'yenet ñocop ñeñ̄pa'cho'ña ama ñeñ̄teye' e'neno ñeñ̄tcha' coshatene' ama't ñeñ̄t achamaret ñocop ama't ñañā ñeñ̄t amtsareñtetsa ochñartsocop. Ñeñ̄t ora añeçhno ñeñ̄t atet nane't Moisés po'ñoñ atetcha' es apueñet Yompor, te'ña ñeñ̄pa' ama coshatenano Yompor; atet oten Cristo. ⁹ Elloña ñapa' atet oten, "Napa' añecopña nehuapa Nompore, o'ch netsotosnaþ ñeñ̄t atet pemnen þa." Ñeñ̄pa' añ eñotatosey, ña a'huañatose' ñeñ̄t ahuatoñen atto muetsete't eyarra po'chñarecop. Attoña ñapa' nosan po'ñioñ ñach rromosets yo'chñarecop. ¹⁰ Ñeñ̄to'marña Jesucristopa' pomosa ñañeña yo'chñarecop. Ama't parrocha rromapa' ñeñ̄pa' allohuñacpay. Atto ñapa' etsotenan ñeñ̄t atet muenen Pompor yañapa' e'ñe a'cohuentaterrey Partsocop. ¹¹ Ñañā ñeñ̄t cornaneshatyets judioneshacop ñet pate'tets yetpa' chocma tenet all altaro allofecma sherbeñet Yompor allecma muetsanaterretañe't eyarraçhno ñeñ̄t ochñartsocop. Tarraña ama't amtsareñtenaþpa' amach erroñenot ahuanmanoña ochñarets. ¹² Tarraña Jesucristopa' e'ñe parrocha pomuerra e'ñe ñañeña ñach amtsareñtertsa ochñartsocop. Ama't parrocha rroma ñeñ̄pa' allohuñacop e'ñech errponohuañenacop. Allempoñapa' o' alla anorruerr Pompor po'cohuenrot allña partsotuerr. ¹³ Allotña cohuenan allohuñen ñeñ̄t e'moñe'tene' esempohuañenpa' a'mchechatuerranetcha'. ¹⁴ Jesucristo allempo pomuerra ñañeña, ñapa' e'ñe etsotatuerrnay attoch e'ñe a'cohuentaterrey Partsocop. Ama't

parrocha rrroma ñeñtpa' e'ñe allohuacop ama't ahuatoteñ errponohuañenacop añecop ñeñt pueyochresha' pen Parets. [15-16](#) Ama't Yompor Puecamquëñ ñeñtpa'cho'ña eñotoçhtatennay tarro'mar ñapa' añ eñotatyet ñeñt atet otyet Yompor, ñeñtpa' atet ot:

Esempohuañenpa' napa' o'ch na'poctaterranet po'pocheño. Ñeñtpa' atetcha' neperranet. Allempo esheccha'ña neçhapaterranet neñioñ e'ñe pueyoçhreto. Ñeñtpa' ñato' o'ch netma'ntacha atto neñioñpa' o' aquellcareterret e'ñe ñiet pueyoçhreto ñeñtpa'ca'yeña cotape'chaterrahuetña e'ñe cohuen.

[17](#) Ellonetpa' atet ote't allempo:

Napa' amach alla neyerpuerranete'te po'chñaret. Ama't ora atto ałpare'tnete'tpa' amachña ñeñta alla neyerpuerranete'te.

[18](#) Ñeñto'marña yeñoteñ atto Yomporpa' o' peretna'huerrnay yo'chñar amach alla yerpuerrnaye'te ñeñto'marña amach alla es yemtserre'te ñeñt yo'chñarecop.

Te'pa' ama es palltetso yocop attoch e'ñe cohuen ye'ñorana'tera Yompor Parets

[19](#) Ñeñto'marña masheñneshacha' ñamá noçhaneshacha' te'pa' yeñoteñ e'ñe pocte' yocop e'ñe ya yeçhore'teñot Yomporpa' e'ñech yeyemteña e'ñe atet ñerra'm yamo'ts yeyemtena e'ñe allame'tets. Ñeñtpa' añ toma'ntena ñerra'mrrate' o' yebe'terr e'ñe allohuacop Parets po'ponro all po'prahuo atet pe't ahuat cornanesha' ñeñt be'tostse't ñapuet ñeñt anmaye't

eyarra po'rras all, tarro'mar te'ña atto o'rroma Jesucristo yocop, po'rrasña ñeñtña e'ñe ya'poctaterre'ña ya attoch ye'ñorana'tera ama't ñeñt atarr Parets. ²⁰ Po'ñočh Jesucristo e'ñe ña po'chtsoč orrtaterrnay po'poñ etserra attoch yapa'cho'ña o'ch yečhapampera Yompor attoch ye'ñorana'tera. Ñeñtpa' e'ñe cohuen attoch eyemteña e'ñe po'ñočh. Ñeñtpa' añ toma'ntena ñerra'mrrate' Cristopa' o' čchapaterrey allohua yottampeññañet besmo Parets po'ponro all po'prahuo. ²¹ Jesús te'pa' yeñoteñ ñeñtña atarr Yecorneshar yepen ñeñt čhets Yompor pa'pacollo, ñapa' allña amčha'taretetuerra Yomporepahuo añecop allohuen ñeñt pueyočhreshačhno pen Parets. ²² Ñeñtmarña e'ñe eyemteñočpa' amach yemčha'nañočayaya yečhore'teñe. E'ñepa'chña yeñmañesha' yevočhrocmañen yečhore'teñ, tarro'mar Cristo po'rrasoña o' a'cohuentaterrnay yevočher atto te'pa' o' e'ñe cohuen yočape'chyerr, amachña allo'na yerpapa'tatnenye yo'chñar. Ñeñtpa' añ toma'ntena atto yapa' e'ñe cohuen apataretey oño ñeñt poctetsa Partsocop. ²³ Chocmuepa'chña yecueñña ñeñt eyemtena allochñapa' a'queshpaterreycha', amuepa'chña čha ye'čharrtatstenoña yevočher tarro'mar Yompor ñapa' čhochmach a'poctaterrnay po'ñoñ ñeñt atet otene. ²⁴ Ñama añepa'chña e'ñe cohuen ye'nen attoch yeyenpannena allohueney allochñapa' attoch e'ñe cohuen yečhen morrentanna'teñets ñama e'ñech cohuen es yeyenpannena. ²⁵ Ñama čhochmuepa'ch yesen all čhochma yapčhena e'ñe yame'ñeñot Cristo.

Amachña atta yeþatsto ñeñt atet pena po'potantañ ñeñt ama huetso allecma yapchena. Añcha'ña atet yepena allempo yapchena e'ñech cohuen yoctape'chatannena Yomporecop. Elloña te'pa' chocmach yapchena ñeñt nanac cohuentetsa yocop tarro'mar yeñoteñ te'pa' o' cherrmoch allempoch huerra Yepartseshar Cristo.

26 Tarro'mar ñerra'm o' yeñoter po'ñoch Cristo rromats yocop attoch a'queshpaterrey ñama ñerra'm ñeñto' yame'ñerra tarraña ñerra'm allo'na yesen ochña'tare'tnomuets e'ñe ya yemneññoþpa' allempopa' amach eñalleña ñeñtcha' rromuerrtserr po'pocheño ñeñtcha' yetsa'terroyerr ello yo'chñar. **27** Ñeñt allo'na sets ochña'tare'tnomuets añach o'paterrahuet coñcheñets ñeñt atarr amcha'nochtetsa ñeñtara Yompor po'yorochenña ñeñt tso'pa' e'ñech e'nuerran allohuen ñeñt e'moñe'tene' Yompor. **28** Nehua, ahuat ñerra'm eñall ama't puesheñarra ñeñt atpare'taye't Moisés po'ñoñ, ñerra'm eñall epsheña amapa' ma'psheña ñeñtcha' a'metamþpene' ñeñtña atparñaþpa' ahuo'ch muetse allohuen acheñenesha'. Ama't puesheñarrapa' amach eñalleña ñeñtcha' morrentaya. **29** Elloña ñeñt ama esoye' entenaye Yompor Puechemerpa' atarrcha' nanac a'coñchatareñterret. Elloña po'rras ñeñtcha' a'cohuentaterrahuetañ Partsocop ñeñtpa'cho'ña ama esoye' enteñeto ama't ñeñt errasatser ñeñt etserra a'poctatañtetsa. Elloña ama't Yompor Puecamquëñ ñeñtpa'cho'ña chach sasare'teññañet ñeñtara Puecamquëñ ñeñtcha' morrenterrahuetañ attoch chorrellanetañ.

Ama't señoteñeña elloña atarrcha' nanac acoñchatareñterra ñeñt ateñ atarr tsena'tene' Yompor Puechemer. ³⁰ Tarro'mar yapa' yeñoteñ Yomporña ateñ otets: "Napa' ñeñtencha' coñchaterrahuet, napa' ñeñtencha' tsa'taterrahuet." Elloñapa' ateñ oten Yompor: "Napa' ñeñtencha' otteñe'cherrahuet attochña necoñchaterranet ama't ñeñt neyochreshaçhno nepeneñ." ³¹ Ñeñto'marña yeñoteñ atarr yoroçheno'tsen ama't allohuen ñeñt aña o'patenaya ñeñt po'yoroçhenña pen Yompor ñeñt ama arromñateshayaye.

³² Tarraña te'pa' o'ch notas, o'ch alla seyerpuerra ateñ seña ahuañmo'cha allempo e'ñe errtes eñoterre' po'ñoçh Cristepa'tña a'queshpatañ. Ñeñtpa' allempo ñanom a'puetarsam̃psareñta seyoçhro soctaþña. Allempopa' ama't atarr amueroçhtatareteseñ sañapa' e'ñe sa'huanta'huanom pa'namen topateñtsoçhno ñeñt setantyesoya; ñeñtpa' e'ñe ateñ ñerra'mrrate' sapa' çho atarr seçllarena. ³³ Patanta'ttsospa' atarrca'ye che'tatsetaseteñt e'ñe allo'tsa'yen allohuenacheñenesha'. All atarr sa'mueroçhtataretta. Elloña ñerra'm esempo mueroçhtateñet po'potantañ samo'tsesha' sapa'çho'ña chocmach semueroçhtapretaneteñt. ³⁴ Po'ñoçh ñeñt arrmanatarettatseñt o'ch ayottam̃psareñtet, sañapa' e'ñe sellcapreteñofanetpa' chocmach e'ñe cohuen seyenpuenanet. Ama't allempo puerratañpsatsre'taseñt ñeñt se'moñe'tyesayeñt, sañapa' e'ñech socsheñesha' sa'huantenonet.

Tarro'mar sapa' señoteñ o' secherr ento ñeñt atarr sherbets ñeñt ello metana'tuene' atto sherbenes sechatser, tarro'mar ñeñtpa' ama apptaño. ³⁵ Ñeñt' marña masheñneschacha' o'ch alla noterrserr, amach alla sequeçhpatserrñañe ñeñt atto atarr seyemteña Cristo tarro'mar Yomporpa' ñachña atarr cohuen setsa'terraya. ³⁶ Te' sapa' aña sepalltena attoch e'ñe acopá sa'huanta'huanom ñeñt atarr echarr sentyen, attochña allo'nach sesen pa'yesnomue' ñeñt atet muenen Yompor, attochña Yomporpa' apuerrescha' ñeñt e'ñe atet otene. ³⁷ Tarro'mar yeñoteñ Yompor po'ñoñ ñeñt aquellcareñ ahuatoteñ ñeñtpa' Cristocop atet oten: O' mameshamerra o'ch orretuerra ñeñtcha' huerrtsa, te'pa' amach alla atomato pue'ntaño.

³⁸ Tarraña Yomporpa' atet oten:

Ñeñt e'ñe pocte' nenten na ama't erra'tsenaacheñer tarro'mar e'ñe pueyemteñoten na, ñeñtñapa' corretsach. Tarraña ñerra'm esesha' nepuerram̄perraya ñapa' o'huañcha' allo'na coshatenen.

³⁹ Tarraña yapa' ama atfeyayye ñerra'mrrate' ñeñtcha' puerram̄perraya Yompor ñeñtcha' chenquërrtsa. Yapa' añeyca'yeña ñeñteycha' chocma yemterraya Yompor ñeñtchaycha' a'queshpatarettertsa e'ñe yecamquëñohuen.

11

E'ñe yeyemteñot Yomporpa' e'ñech cohuen es yet-sotayen ñocop

¹ Ñehua, allempo po'ñočh yeyemteña Yompor e'ñe yeñoteñ chocmach apuerrey ama't esempo

ñeñ̄t atarr yecuen te' e'ñe yenamueñō. Ama't ama yenteña' e'ñe yeyočhroña yeñoteñ ñeñ̄t yecuen te' po'ñočhpā' apuerreycha' ama't esempo. ² Yatañneshañ ahuatpa' atarr yemuetyesete' Yompor. Ñeñ̄t atto yemuetyesyete' Yomporñapa' e'ñe pocte' entyesanete'.

³ Ñaňa ya e'ñe yeyemteñō Yompor te'ñapa' o' yeñoter allpon ñeñ̄t yentyen arr patsro ñeñ̄tpa' e'ñe po'ñoñoña yečhca'hua. Allempopa' ama't coñe'ta ama es orrtetso ñeñ̄tcha' pa'namen yečhcatyes ñeñ̄t ateť yentyen te'.

⁴ Ñaňa Abel ahuat atto yemtane' Yompor, ñapa' apan Yompor ñeñ̄t atarr coshate'. Pa'mo'nasheñña Caín ama't apaneñ ñaňa Yompor, ñeñ̄tñapa' ama coshatano Yompor. Ñeñ̄to'mar Yomporpa' e'ñe cohuen agapan ñeñ̄t ap Abel; attoña Yomporpa' eñotatanet e'ñe pocte' entapretan Abel. Tarraňa Abel ama't rrromaňpa' atto atarr yemtane' Yompor, ñeñ̄tpa' e'ñe teme'ttsen eñotateney ñeñ̄t cohuen enten Yompor. Ñeñ̄tpa' attema't ñerra'mrrate' Abelpa' teme'ttsen serrpare'tateney cohuen.

⁵ Ñaňa ahuat Enoc ñeñ̄t atarr cohuen yemtaye' Yompor, ñapa' e'ñe ora aner Yompor pue'ntaño e'ñe betnatot. Ñapa' ama čhoye' rrromo arr patsro. E'ñe atta a'chencach pamo'tsesha' ama esesha' enterraye tarro'mar Yompor erraya'. Ñehua, allempo ama a'tapatera' Yompor pue'ntaño ñapa' atarr cohuen coshatane' Yompor allempo aňe patsro'tsen, tarro'mar ñeñ̄tpa' ateť otén Yompor po'ñoñ ñeñ̄t aquellcareť. ⁶ Ñerra'm ama

yejemteñé Yompor amach errotenoñ yocshateñé ama't e'ñe mamesha. Tarraña ñerra'm esesha' muenene' o'ch yemteret ñiamet Yompor añ poctetsa o'ch otet po'ñočhpa' Yomporpa' eñall, ñama eñoteretepa'chña Yomporpa' čhocmach coshaterran allohuen ñeñt e'nene' ña. ⁷ Ñama ahuañ Yomporpa' eñotatan Noé ñeñtcha' atet e'chopan oñ tsapatonet. Allempo atet otan Noé ama't mameshapa' ama huate'te. Tarraña Noéñapa' e'ñe yemtenana atet och Yompor allempo. Ñañapa' yečhcatuan po'compuer allochñapa' attoch a'queshpatan pamo'tsesha'. Atto yečhcatan po'compuer e'ñe ñapuet e'ñe pueyemteñóñ Yomporpa' eñotataneñña allohuen po'potantañečhno pamo'tsesha' ñetpa' coñchatuerranetcha' Yompor. Ñeñto'marña e'ñe pueyemteñóñ Yomporñapa' e'ñe pocte' entenan Noé.

⁸ Ñama ahuañ Abrahampa' allempo čhore'ch Yompor o'ch mueñe allapar allcha' apuer pats, ñañapa' e'ñe pueyemteñóñ Yompor e'ñe cohuen ame'ñya. Allempoñapa' sa'nman pa'netser o' ahuo' ama't ñapa' ama eñoteñé allcha' ta tarro'mar ama puentare all sen. ⁹ Allempo čhap anetso all oteñ Yompor ñeñtcha' apuer esempohuañen, allñapa' all yečhosa e'ñe pueyemteñóñ Yompor. Tarraña ña allpa' atta yečhosa atet ñerra'm ahuapña. Ama't ñeñt patspa' ñeñt o'patateñá Yompor ñeñtcha' apuer, tarraña allempopa' ama apueña' Yompor ñeñt atet oteñ. Ñeñto'marñapa' atta shetamtsopo'tos all manatoset. Ñama ama't ñeñtcha' po'mreneñ perr Isaac ñama Jacob

ñetpa'cho'ña attera yečherret shetamtsopahuo. Ñetpa'cho'ña atta cohueñet esempohuañencha' apuerranet Yompor ñeñt patser e'ñe atet otenanet ñamet. ¹⁰ Abraham po'ñočhp'a' aña cohuen ñeñt Yompor pa'netser ñeñt e'ñe echarr aþaret tarro'mar Yompor yečhcatene' e'ñe echarr peñ.

¹¹ Puetapor Sarapa'cho'ña e'ñe pueyemteñot Yomporpa' cheyore'terr ama't ñapa' o' atarr po'nme'ten. Ama't o' meten allempo atto cheyore'ten coyanesha' e'ñe pueyemteñota Yomporpa' ñia ahuamencat pe' attoch cheyore't. Tarro'mar ñapa' atarr ayemuetpo' entenan Yompor atet oteñ. ¹² Attoña e'ñe Abrahamota atarr mererra shonte'acheñenesha' nanac ama't ñapa' o' atarr nanac po'nme'ten allempo. Allponacheñenesha' ñia e'ñe po'mřreneñ pohuenahuet ñeñt allpon shonte' nanac atet ñerra'mrrate' ora allohuen rantočhno ñeñt ento'tsa'yen ñama atet yenteññañ sa'p po'mñer ñeñt ama e'ñotuapahuoyaye.

¹³ Ñeñtet alponet atarr yemuetnomuet Yompor ama't allempo Yomporpa' ama apuenaneta' ñeñt patser ñeñt o'patatanete't. Tarraña ama't ama aparetterreta' ñeñt patser ñeñt o'patatanete't Yompor, ñetñapa' pueyemuetneñotet Yompor eñoteñet ñetpa' aparetterretch'a' ñeñtcha' po'ñočh pa'netser perret. Ñeñtcha' atarr coshaterrahuet. Tarro'marña ñetpa' eñoteñet aña patser po'ñočh ama pa'netsreye' peñeto. Ñetpa' ahuapñanesheta entenet arr patsro.

¹⁴ Ñehua, yeñoteñ acheñ ñeñt atet entetsa ñerra'm ahuapñanesheta ñetpa' aña e'nenet

ñeñtcha' e'ñe pa'netser perret po'ñočh. **15** Ñamá ama añeye' pa'netser peneto alloč onet tarro'mar ñerra'm ñeñta e'nenañpa' po'ñočhpa' o'ch alla puererretañ alloč onet tarraña ñetpa' ama ñeñtseye'ña e'name'teneto. **16** Ñetpa' añña e'nete'ñ ñeñtcha' e'ñe pa'netser perret po'ñočh ñeñt atarr nanac cohuen, ñeñtpa' añepa'ñ Yompor pa'netser ñeñt pue'ntaño'tsen. Ñeñto'marña Yomporpa' e'ñe pocte' entenanet ama penquénaneto affo Po'yomporer peñet. Ñañapa' o'patatenanet ñeñtcha' e'ñe po'ñočh pa'netser perret all pue'ntaño.

17 Ñamá allempo Yomporpa' atarr topatan Abraham; ñeñtpa' ateñ otan Abraham: "Te'pa' o'ch pemtser pechemer Isaac e'ñe ateñ ñerra'm ñeñt muetsenet nocop." E'ñe pueyemteñot Yompor Abrahamñapa' e'ñe pocte' eñch o'ch poman puechemer Isaac o'ch muetsse Yomporecop. Ñehua, Yomporpa' ateñ o' otuan Abraham ahuañoteñ: **18** "E'ñe pechemereshot Isaacpa' mererrach shonte' acheñenesha' ñeñtcha' e'ñe pemñreneñ peperr." Tarraña ama'ñ ateñ oteñeñ Yompor, ñañapa' e'ñe pueyemteñot Yomporpa' e'ñe pocte' eñch ahuo'ch muetsan po'pañrror allempo ateñ otererr Yompor. **19** Tarro'mar ñapa' ateñ oten, Yomporpa' atarr ahuamencatesha' ñach tantatuerre' ama'ñ ñeñtcha' rrromats. Ñeñtpa' ateñ ñerra'mrrate' Yomporpa' o' alla tantaterrñañ puechemer rrromot, o' alla agapuer pompor po'pocheño.

20 Isaacpa'cho'ña allempo po'n e'ñe pueyemteñot Yomporpa' enaman puechemere-

shacop Yompor pa'nateña añecop Jacob ñama Esaú; ñeñtcha' atet bensare'tam̄perrananet tsapañonet. ²¹ Jacobpa'cho'ña allempo rromamoch e'ñe pueyemteñoñ Yomporpa' enam-atnoman Yompor pa'nateña pue'ñareñolleshacop ñeñt puechemer José puechemerñollesha' puepo'nmeñoñpa' po'carra quellpuena allña ma'yochenanaña Yompor. ²² Josépa'cho'ña e'ñe pueyemteñoñ Yompor allempoch rroma allaþpar all anetso Egipto, ñapa' atet otnoman pamo'tsesha': "Po'ñochpa' chocmach ñchap allempoch allohuenes israelena'tarneshas secha'nerrcha' arrot Egiptoñ, o'ch sahanerra allo'tsen pats ñeñt o'patatyet ahuañoteñ Yompor ñeñtcha' apuerrey. Ñama ñerra'm esempoch ahuerres arroñpa' sanerrnancha' nenpa'ts."

²³ Ñama allempo eñalleta Moisés, pamo'mte'ñapa' e'ñe cohuenatoll entan ematoll. Ñetpa' e'ñe pueyemteñoñet Yomporpa' o' e'pochet. Ama mecha'teññañeto am̄cha'taret po'ñon ñeñt atet nen attoch chocma muetsanachet allohuens asheñorrotollesha' ñeñt eñalletyetsa. E'ñe ma'pm̄a arorr alla e'poteñet. ²⁴ Tarraña Moisés allempo o' po'n ñapa'cho'ña e'ñe pueyemteñoñta Yomporpa' ama mueno o'ch oteñet ño' pue'ñar penña am̄cha'taret, tarro'mar ñapa' atfa ñañreteña am̄cha'taret po'señ ñeñt egipio'marnesha'. ²⁵ Ñapa' añña e'ñe pocete' ent o'ch mueroçhtapretana israelnesha' ñeñt e'ñe pamo'tsesha' pen ñeñtara ñeñt pueyochreshaçhno pen Yompor. Ama pocteye' entano o'ch coshapretana egipio'marnesha' ñeñt

atet yeñhenet ñeñt ama pocteye' enteno Yompor tarro'mar ñapa' eñoteñ ñeñtpa' e'ñe mamecpa atet coshenet. ²⁶ Ñapa' atta ahuantenan atto atarr sasare'teñet israelnesha'. Tarro'mar ñapa' añ pocte' enten o'ch mueroçhta Cristocop. Ñapa' ñeñtña atarr cohuen enten, ello metana'tuenan ñeñt atet sherben allohuen ñeñt esocmañen ñeñt atarr morrentena egipto'marnesha'. Tarro'mar ñapa' aña cohuen ñeñtcha' apuer Yompor ñeñtcha'ña atarr coshaterre'.

²⁷⁻²⁸ Ñeñto'marña Moisés e'ñe pueyemteñot Yomporpa' atet otan allohuen israelena'tar ñeñt Egipto'tsa'yen: "Te'pa' o'ch semtsa carrnerotoll tarro'mar Yompor otets. Ñeñtña po'rraspa' o'ch seshellcata'tyes allot sebe'ten so'ponro, allochñapa' ñerra'm esempoch huapa mellanoñeñ ñeñt amñareñ ñeñtcha' muetsanatuenaya' allohuen egipto'marnesha' po'moternesha' attochña sa ñeñtes israelena'tarneshaspa' ama't puesheñarroñesapa' amach muetsenso." Ñama Moisés e'ñe pueyemteñot Yomporpa' sa'nerran anets Egipto, ama mecha'tnomano ñeñt amcha'tarettetsa all Egipto ñeñt atarr atsrre'mñañ. Moisëspa' atta ahuanta'huanman allohuen ñeñt atarr echarr entyen tarro'mar ñapa' añ e'ñe yemtena Yompor ñeñt ama't ama entpahuoyaye. ²⁹ Ñama allempo onaçherr allohuen israelena'tarnesha' Egiptot allempo çhaçha'tet atarr sa'po ñeñt otenet Sa'p Tsasasen, israelena'tarnesha' e'ñe pueyemteñot Yomporpa' e'ñe atta ahuanmoset all chope'chnomuet atet ñerra'mrrate' e'ñe

porrare' patso chope'chenet. Egipto'marnesha'ña ñeñt̄ cołahuetañpa' ñetpa'cho'ña ahuanmosetañ ñamet all sa'po, tarraña ñetñapa' e'ñe allohuinet ño'shrra'tuosetña all oño.

30 Ñaña allempo čhačha'tet all anetso Jericó ñeñt̄ allo'marnesha'pa' ama mueneñeto o'ch abe'tosam̄psarettet. Tarraña israelena'tarnesha' e'ñe pueyemteñoñet Yomporpa' cančherrmatoset; o' cančhrroch puetesam̄psame'toset ñeñt̄ anetser Jericó ñeñt̄ atet̄ otanet Yompor. Allempoña e'ñe pueyemteñoñet Yomporpa' ñeñt̄ cončhet allo acončha'tam̄psaret̄ ñeñt̄ anetser all puetesme'tet cančhrroch e'ñepa'tcha' ñoña mata'nom. **31** Ñaña Rahab ama't̄ ñeñt̄ atarr ecañoreshaňtatse't̄ ahuatpa' atto atarr yemterrana ñaña Yompor, ñeñt̄ coyanesharpa' ama rrromo allempo a'cllataretta allohuen pamo'tsesha' ñeñtara jerico'marnesha' ñeñt̄ atarr aňpare'tyesaye't̄ Yompor all anetso. Tarro'mar ñapa' e'ñe cohuen agapan pa'paclo allponsheña israelena'tar ñeñt̄ ñanom amňareňtatsa all anetso ñeñt̄cha' eñotenaya' erroňtente'ña ñeñt̄ anetser ñaña ñeñt̄ yečhetsa all, ñato' ahuamencaňtarerette' ñato'pa' amate'.

32 Po'potantaňečhnopa' shontemeñ ñeñt̄cha' alla neyerpaterraňerr ñeñt̄ atarr yemtaye't̄ Yompor ahuat. Tarraña ama eňalle allponmat yet̄ attoch alla neyerpatuerra allohuen ñeñt̄ atarr yemtaye't̄ Yompor, atet̄ ñerra'm Gedeón, ñaña Barac, ñaña Sansón, ñaña Jefté, ñaña David, ñaña Samuel ñaña allohuen ñeñt̄ a'mita'yesaye't̄ Yompor po'ñoñ ahuat. **33** Tarraña allohuinet e'ñe pueyemteñoñet Yomporpa'

pa'namen etsotayenet ñeññ atet muenatenanet Yompor. Puesheña'ttsetpa' e'ñe a'mchechueñet po'potantañ am̄cha'taretneshačhno ñeññ e'moñe'tenahuet. Po'potantañapa' e'ñe pueyemteñoñet Yompor e'ñe cohuen am̄cha'taretnenet. E'ñe pueyemteñoñet Yompor ñapa' alla yenpuerranet ñeññ atet otanete't. Ama't po'psheñeñpa' e'ñe pueyemteñoñet Yompor ama muenatano ma'yarr o'ch erröt pe'. ³⁴ Ñama ama't tso'ña ama't atarr huomenc huorten ama muenache o'ch atserrpe'. Po'psheñeñpa' e'ñe pueyemteñoñet Yompor ñapa' a'queshpach attoch ama muetseto espado. Po'potantañpa' ama't ama eñalleto po'huamenc, e'ñe pueyemteñoñet Yompor atarr ahuamencat ñpanet. Ñeññña huomencñiatserpa' alloña quellarenet. Atto e'ñe a'mchechuet ñeññ e'moñe'tenahuet. ³⁵ Ama't po'potantañ coyaneshačhno ñetpa'čho'ña e'ñe pueyemteñoñet Yompor, o' alla atantataretterret pamo'ts ñeññ rromuets.

Po'potantañ ama't atarr atserrpātse'taretnenet, ñetpa'čho'ña e'ñe pueyemteñoñet Yompor ama mueneñeto o'ch quečhpuet Yompor attoch a'rroyaretetyerret. E'ñie pocte' enteñiet o'ch rromuet pueyemteñoñet Yompor tarro'mar ñetpa' eñoteñet allach tanterret ello ñeññ atarr nanac cohuentetsa. ³⁶ Po'potantañečhno ñetpa'čho'ña e'ñe pueyemteñoñet Yompor ahuanta'yenet pa'namen atto atarr atserrpātse'taretyesete't — attoña atarr ache'tatsetarettete't, all ashtarettete't, ehuancanatarettete't, ayottam̄psaretyesete't. ³⁷ Po'potantañ

amtsanatarettete' t atto arrollapecharettete' t.
 Po'potantañpa' ashesharetetyesete' t e'ñe
 puerrochreto atto amtsanatarettetyesete' t,
 atarr huomenc huapanete' t topateñets.
 Po'potantañ espado amtsanatarettetyesete' t.
 Po'potantañ atta chopeñe' chyesete' t, aña
 chorra'yesete' t carrnerorrom, ñama cabrarrom.
 Atarr huocchañetyesete' t attaña atarr
 amuerochtatarettete' t atto atserrpa'yesarettete' t.
 38 Atta chopeñe' chyesete' t amayo'mar,
 aspeno'mar. Esho'tyesete' t arroroto'mar,
 mapuetpono'mar aña patsro. Allohuinet
 ñet ñeñt atto atarr amuerochtatarettete' t,
 Yomporñapa' atarr cohuen entanete' t. Ello
 metana'tueñet ora allohuenacheñenesha' arr
 patsro. 39 Allohuinet ñeñtet atarr yemtete' t
 Yompor ahuat, Yomporñapa' e'ñe cohuen
 entanete' t, tarraña ñetpa' amaña enterretoña ora
 allpon ñeñt atet otanete' t Yompor ahuat ñeñtcha'
 atet apuerranet. 40 Tarro'mar Yomporpa' ama't
 ahuatoñeñ aña cotape'chen ñeñt ello nanac cohuen
 enten ña. Ñeñtpa' yocpa'na allohuenacpay.
 Ñapa' aña muenen allohueney parro o'ch
 etsotaterrnay ñeñt o'patatenya ñeñtcha' e'ñe
 cohuen ya'cohuentaterre' allohueney.

12

Chocmuepa'chña e'ñe yeuemuetneña Yepartse-shar Jesús

1 Ñeñto'marña yeñoteñ shonte' acheñ ñeñt
 orrtatyesaye' t ahuatoñeñ; e'ñe pueyemteño'et
 Yompor e'ñe etsotayesete' t Yomporecop ñeñt

atarr echar. Ñañma ñet te'pa' o'ch netma'ntatanet ñerra'mrrate' allohuenetpa' o' cohuapreterryet yamia o'ch entyesyet erroñencha' yetsota yamia ñeñt atet muenateney Yompor. Ñeñto'marña yocoppa' añ poctetsa o'ch e'ñe yesuanom ama't erra'tsena ñeñt yepatare'tene' ama't ñama yo'chñar ñeñt atarr yetpatyene'. Ñama e'ñepa'ch ya'huanta'huanom allohuen ñeñt echar. yentyen. Allochñapa' attoch e'ñe cohuen yetsoteññañ ñeñt atet muenateney Yompor. Ñeñtpa' e'ñe atet ñerra'mrrate' ñeñt matetsa ñetpa' chocmach chapuet allohua onañchareñtenet ñocpuet. ² Añcha'ña chocmuela'chña e'ñe yeuemtneña Jesús ñeñt orrtaterre' attoch yeuemtera ñama ñeñtcha' yetsotaterre' ñeñt atto atarr yeuemtneña. Tarro'mar ñapa' e'ñe pochte' eñche't o'ch ahuanta'huan allohuen ñeñt echar. ente't ama't atto rroma corsocho. Ama't ñeñt atarr apencochen entyenet, ñapa' e'ñe poctacma ahuanta'huanem. Tarro'mar e'ñe pueyemteñota Pompor ñapa' eñoteñ ñach apapuerre' ñeñtcha'ña atarr coshatuerre'. Ñeñto'marña te'pa' o' alla anorruerr Pompor po'cohuenroñ all anen po'canaño allña partsotuerr ñama.

³ Nehua, te' sapa' o'ch alla seyerpuera Jesús atto ñapa' atarr mueroëhtater ñeñt atarr ochñañenesha' ñeñt atarr e'moñetayet. Tarraña ñapa' allohuen mueroëchteñetspa' e'ñe ahuanta'huanem. Allochñapa' sapa'cho'ña amach ña semuenme'chatsche ñeñtcha' atarr echar. sehuapoya, attochña amach ña llecatenso. ⁴ Tarraña saña ama't atarr satpare'tyeñeñ

atto atarr topatase^t so'chñar amaña čhoye' muetsenseto ñeñt atet aparetta Jesú, ashataretta po'rras ochñartsocop. ⁵ Ñama sapa' o'te' čha sepuesua ñeñt atet cotape'chateney Yompor po'ñoño allohueney ñeñtey puechemer pen. Ñeñtpa' atet oteneys po'ñoñ:

Nechemere, ñerra'm esempo cotape'chaterres cohuen Yompor amachña atta sentatsche ñerra'm ama esoye' sherbeno. Ñama ñerra'm esempo coñchatas mame' attoch o'ch alla socotope'cherr cohuen amachña ñeñtota čha muene' sequečhpatsere. ⁶ Tarro'mar allohueney ñeñtey morrentena Yompor ñeñteycha'ña cotape'chatter cohuen. Ñama allohueney ñeñtey puechemeresha' pen ñeñteycha'ña coñchatyes mamesha'tets attoch o'ch alla yoctape'cherr cohuen ñocop.

⁷ E'ñepa'chña ya'huanta'huanom atto coñchateney mame' tarro'mar ñapa' añ muenen o'ch e'ñe puechemer perrey poctacma. Ñehua, yeñoteñ e'ñe pocte' atto ñeñt achemereshat errotenopa' o'ch coñchachet puechemer mame' allochñapa' attoch e'ñe cohuen ame'ñenanet puechemer. ⁸ Tarro'mar ñerra'm esesha' ama coñchatenaye mame' puechemer attoch e'ñe cohuen ame'ñachet ñeñtpa' po'ñoçh ama puechemereye' peñe; ñeñtpa' čha ottena ñerra'm ellapnanesha'. Ñeñtoma sapa'cho'ña ñerra'm ama coñchatenso Yompor mame' attoch same'ñya e'ñe cohuen po'ñoçh amaca'ye puechemereye' penso. ⁹ Elloña yeñoteñ

allempo cheshenya' ñeñ̄t yompor yepen arr patsro atto e'ñe cohuen cotape'chatyesye't, ñeñ̄tpa' e'ñe pocte' yeñche't tarro'mar yeñoteñ ñeñ̄tpa' e'ñe cohuen yocop. Ñeñ̄to'marña te'pa'cho'ña e'ñepa'chña cohuen yenteñ atto Yomporpa' o' cotape'chaterrey cohuen ñeñ̄tara Yompor ñeñ̄t pue'ntaño'tsen ñeñ̄t pamo'mte' pen yecamquëñ attoña yapa' corretsayach.

10 Ñehua, ñeñ̄t yamo'mte' yepen arr patsro ñetpa' e'ñe allponmata cotape'chatyesyete't allempo yapa' cheshenya'. Ñetpa' chocma coñchatyesyete't allpon pocte' entyesete't ñet. Ñama Yompor atto allpon coñchatyeney mamesha'tets ñeñ̄tpa'cho'ña e'ñe cohuenacma yocop allochñapa' yapa'cho'ña e'ñech cohuenare' es yorrtatyen e'ñe atet ñerra'm ñapa' e'ñe cohuenare' es orrtatyen.

11 Ñama yapa' yeñoteñ ñerra'm esesha' yecoñchatene' ñeñ̄tpa' ama cohuenaye' yenteñ e'ñe allempo coñchatenyet, tarro'mar ñeñ̄tpa' chocmach llecatenyet. Tarraña puecoñchateñoñetaypa' o'ch yeñoterr ñeñ̄t atarr cohuen enten Yompor. Allochñapa' attochñña e'ñech yocsheñesha' yeychena cohuen muechet.

*Ñato'tña atta es sepčham̄pena'ña ñeñ̄t atet anaret
Partseshot socop te'tña ama sečherro ñesho*

12 Ñeñ̄to'marña te'pa' o'ch notas, o'ch alla setanterra o'ch alla sa'huamencaterra Yomporecop. Atetcha' netma'ntatasa atet ñerra'mrrate' o' alla ahuamencat seperr sot ñeñ̄t čha yoncota'ten ñama atto seyonllocme'chenpa' o'ch alla ahuamencat seperr selloquëm.

13 E'ñepa'ch cohuen es sorrtatyen allochñapa'

ñerra'm esesha' ama e'ñeye' huomencaye' penaye pueyočher Yomporecop, sañapa' amach aña sorrtateno ñeñtcha' a'puerrataterahuet. Añcha'ña sorrtateññañ ñeñtcha' e'ñe cohuen yenpuene'. Ñeñtpa' atetcha' netma'ntatasa ñerra'mrrate' sapa' añ se'nen toñ ñeñt atarr cohuen pačharr sets muepñarero allcha' e'ñe cohuen sechope'chen. Allochñapa' ñerra'm eseshas checa'repuets amach čha sepočtatse'tnomo amach čha sa'tserrpā'nmo attochña e'ñe cohuen sechope'chnom e'ñe huomenc.

¹⁴ Añepa'chña sema'yočhrena attoch e'ñe cohuen samo'tstannena, e'ñech muechet seyčhena epas allohuen samo'tseshačhno. Ñama añačha'ña sočtage'chyen ñeñt e'ñe cohuenare' enten Parets. Tarro'mar ñerra'm aña ama yočtage'cheno ñeñt cohuenare' enten Paretspa' amach errotenot yentereña Yompor. ¹⁵ Ñama señotanna'tnomuepa'ch, ñato' eseshaspa' ama añeye' e'neno Yompor ñeñtcha' yenpue'. Ñama señotanna'tepa'ch ñato'tña ama't e'ñe mameshapa' sorrtatena'ña attoch se'moňetanna'ta. Ñerra'm atet sepenapa' acopoteñpa' o'ch e'ñe epa'huapa' čhach orrtatan atsrre'močhen. Attoňa ñerra'm shonte' acheňenesha'pa' čhach a'sosyatuanel; ñeñtpa' ama pocteye' enteñe Parets. Ñeñtpa' atetcha' netma'ntacha ñerra'mrrate' narmets ñeñt atarr pesherr ye'muen. ¹⁶ Ñama señotanna'tnomuepa'ch ñato'tña esesha' chetenaya'ña ñeñt ama puetaporeyaye. Amapa' ñato'tña atta es sepčham pena'ña ñama ñeñt atarr sherbets Partsocop, ñeñt atet pa ahuať Esaú.

Ñapa' e'ñe pa'chporrñoña pomhuan ñeñt anaret ñocop Partseshot. Ñeñtpa' ñeñt o'patacha pompor ñeñt metana'tuene' ñeñtcha' allpon apa'nman po'poñ puechemeresha' tarro'mar ñapa' ñeñt e'ñe po'moter pen pompor. Tarraña Esaúpa' ama esoye' enteñe ñeñt anaret ñocop Partseshot ñeñto'mar e'ñe pomhuan ñeñt o'patacha pompor ama't e'ñe parrocha rrachet. ¹⁷ Tarraña e'ñe allponmatapa' yeñoteñ o' alla muenerran ñeñt anareñ ñocop Partseshot, tarraña allempopa' amach erroñenot alla apuereterro. Ama't pueya'chpeñesha' enamuerreñ allempopa' amate' erroñenot a'po'poñeterretoña ñeñt atet o' pohuet ñenmañ.

¹⁸ Ñehua, yeñoteñ ahuat allempo Yomporpa' eñotatan israelena'tarnesha' attoch a'poctatanetañ Parets all aspeno Sinaípno, ñeñtpa' atarr yoroñchen. Allña aspeno ñerra'm esesha' chapats ama't pa'rrpapa' allorocmach erroñoset all. Ñeñtña aspenterpa' all huorten tso' ñama ama machecmeto, amcha'noçtena, huomenquëshaten. ¹⁹ All e'morrtena ñama poctor atarr yoroñchen. Atto eñorana'tanet Paretspa' atarr amcha'noçhen enteñet. Ñeñto'mariaacheñenesha' ñeñt e'mñotene' atto eñorena Parets, ñetñapa' atet otyenet. “Ñeñtepata amach allo'na eñorana'tnenye Parets.” ²⁰ Ama eshcaye' ahuantenaye' enteñeto ñeñt atet otareñtenet: “Ñerra'm esesha' chapats ñeñt aspentero ama't pa'rrpapa' amtsareñtetepa' — arolle'tareñtetepa'ch amapa' enapechareñtetepa' panmeto. Ama't ñama eyarra muetsetepa’.”

21 Ama't Moiséspa'cho'ña atarr yoročhen enteñ, ama't ñapa' atet otanet: "Ama't napa' nemicha'na'teñotpa' čha neyonshema'ten."

22 Tarraña sapa' ama sentare aspenet all amicha'nočhtena Parets. Sapa' aña senterr ñeñ Šiónapen ñeñ toma'ntenaya all yečhena Yompor ñeñ ama arromňaťeshayaye. Ñaňa aña senterr Jerusalén ñeñ toma'ntenaya Yompor pa'netser ñeñ pue'ntaño'tsen. Allňapa' shonte' coshame'tampeña mellaňočeňnesha' shonte' nanac. Ñeñ allpon allo'tsa'yenpa' ama e'ñotuapahuoyaye. **23** Ñaňa sapa' aña senterr allohuen ñeñ puechemeresh'a' o' perr Parets ñeñ apčhetsa pame'ñeňočet ña. Ñetňa allohuenetpa' ñeňfet aquellcarečet pa'so'chñečhno Yompor pue'ntaño. Ñaňa sa te'pa' o' senter Yompor ñeňtcha' yeňotaterre' allohueney erra'tsencha' cohuen entyesuerr ñaňa erra'tsencha' ama cohuenaye' entyesuero. Ñaňa allo'tsa'yen allohuenacheňenesha' puecamquěñečhno ñeñ e'ñe pocte' enten Yompor; ñeňtňapa' o' e'ñe etsotatuanet all pue'ntaño. **24** Ñaňa te' o' senter ñaňa Jesúš ñeňt eňosets yocop Yomporesho attoch e'ñe cohuen a'poctatonay etserra. Ñaňa o' seňoterrňaň po'rras ñeňt ashatarettatsa alloňa o' aþpretnarečterraňa yo'chňar. Ñeňtňpa' elloňa e'ñe cohuen yenpuerrey. Ñeňtňpa' ama afteyaye ñerra'm Abel po'rras ñeňt ashatarettatsa ahuat.

25 Ñeňt'o'marňa te'pa' o'ch notas, se'mňoterepa'ch Yompor ñeňt se'ñorana'tenaya te'. Tarro'mar ahuat israelena'tarnesha' ñeňt ama e'mňotaye te'

Yompor allempo eñorana'tanete' arr patsro, ñetñapa' ama eseshaye' queshpatso. Ñeñto'marña yeñoteñ ñerra'm yapa' amach ye'mñotere yanña Yompor ñeñt ye'ñorana'tenaya te' pue'ntañoñ, elloña yapa'cho'ña ama't puesheñarroteyapa' amach eseshay queshperrtso. ²⁶ Ahuat allempo eñorana'tanet aspentot, po'ñoñapa' cha pelle'llchatenan pats. Ñama te'pa' elloña o' alla atet otterrerr Yompor ñeñtcha' atet perrerr, ñeñtpa' atet oten: "Elloña esempohuañen po'pocheñopa' o'ch alla nepelle'llchatterrerr pats, tarraña amach ñiaptayaya pats nepelle'llchaterro, enta'nachña nepelle'llchatterr." ²⁷ Ñeñtña po'ñoñer all oten "po'pocheño" ñeñtña yeñotatene' esempohuañenpa' ahuapore'tareterrach allohuen ñeñt ayeçhcataret ñeñt apelle'llchatpo'. Allempopa' añach a'puerrtsa ñeñt ama apelle'llchatpahuoyaye. ²⁸ Ñama atto amcha'tarettena Yompor, ñeñtpa' ama apelle'llchatpahuoyaye. Ñeñto'marña yeparasyoso'chepa'ch Yompor tarro'mar ñeñt o'patatenyapa' ama ahuapore'tpahuoyaye. E'ñe yemcha'na'teñotpa' e'ñepa'chña cohuen yesherbeñ Yompor ñeñtcha' e'ñe coshatene' ña. ²⁹ Tarro'mar yeñoteñ ñeñt Yeyomporer yepen ñapa' atarr Parets e'ñe atet ñerra'm tso' ñeñt e'nuene' ama't erra'tsena ñeñt ama erroñ apen yenteno.

13

Atetcha' yepa attoch e'ñe cohuen yocshach

Yompor

1 Atterepa'ch chocma semorrentannena allohuenes atet ñerra'm e'ñe semo'nasheñ sepanna'tuena. **2** Ñama amach sepsatsto attoch e'ñe cohuen sagap̄ allohuen ama't esesha ñeñ̄ huapyetsa sepacollo. Tarro'mar ama señotanna'tueno; ñato'rraña añ saguën ñeñ̄ mueñen Yompor atet pena po'potantañ ñetpa' añepa't agapuet mellañoteñ.

3 Ñama chocmuapa'chña seyerepya ñeñ̄ ayottam̄psaretetyetsa. E'ñech cohuen sellcapretenanet atet ñerra'mrrate' sapa'cho'ña ayottam̄psaretes e'ñe parro. Ñama ñeñ̄ amuerochtataretetyetsa e'ñepa'ch cohuen sellcapretenanet ñiamet tarro'mar sapa'cho'ña señoteñ attecma erroñenopa' chocmach semuerochtna samña e'ñe sechtso.

4 Ñama o'ch notas po'poñ: Allohuenes ñerra'm esempo sesna'tena o' e'ñe seyoranna'ta epas setapor e'ñepa'ch cohuen sentña ñeñ̄ atto seyorannena. Ama't parrochapa' amuepa'chña se'nam̄psanna'tatsto. Yacmapa' amach chetatstano coyanesha' ñeñ̄ ama puetaporeyaye ama't e'ñe parrocha. Coyanesha'pa'cho'ña amach agapatstanoña ñama ñeñ̄ ama puerrollareyaye ama't e'ñe parrocha. Tarro'mar Yomporpa' chocmach tsa'taterrana ñeñ̄ chetene' ñeñ̄ ama puetaporeyaye ama't ñama ñeñ̄ aguëne' ñeñ̄ ama puerrollareyaye.

5 Ñama te'pa' o'ch noterrserr po'poñ: Amuepa'chña aña atarr seye'chapretatsetyesatsto quelle. E'ñepa'chña aña socshena ñeñ̄ e'ñe

allpona sechyen. Tarro'mar Yomporpa' atet otene: "Napa' ama't ahuałapa' amach nequečhpueṛṛso, amach na'ypo'ñerrso ama't ahuałta." ⁶ Ñeñto'marña yeyemteñoñ Yompor e'ñech yocsheñeshoñ chocmuela'ch atet yoten: Yomporpa' ñeñtña yeyenpuene' ñeñto'marña amach es yemcha'tatsto. Ama't erroñuanen muene' peney po'potantañ Yomporpa' ñach yecuam̄pene'.

⁷ Ñama seyerpueñoñ chocmuela'ch cohuen senteñ ñeñt a'poñene' Yompor po'ñioñ socop, ñeñtcha' señotatnomue' cohuen. Ñama o'ch soctape'ch ñeñt atarr cohuenare' orrtatyesnomuet sesho, atto ñetpa' e'ñe cohuen yemteñet Yompor, sapa'cho'ña atetcha' seña samia yemtenaya Yompor e'ñe cohuen.

⁸ Jesucristo ñapa' atterach yeyemteña ama't ahuałoteñ, ama't teme'ttsen, ama't ñama erponañoñohuen ñeñtach attera ayemuetpotena.

⁹ Ñeñto'marña amach seyemtatstoña ñeñt po'poñečhno yečhateñets ñeñt ama atteye' ayčhatareñeso ahuañmo'choñeñ. Tarro'mar añaña poctetsa o'ch huomenc yeña' yeyočher e'ñe Yompor puemorrenteñoñey atto atarr yenpueney e'ñe atta. Ama añoñeye' huomenc yepenoña yeyočher atto es yerra'yen amapa' atto es yetore'tyena. Tarro'mar ñeñt coñene' aña yečhateñets rreñtsocpa'na, ñeñt yečhateñtsorpa' ama yenpuenaneto attoch huomenc pa'nmuet pueyočher Yomporecop.

¹⁰⁻¹¹ Nehua, yeñoteñ ñeñt corneshatets judioneshacop ñerra'm esempo muetsenet eyarra

all altaro ñeñt̄ po'chñarecpuet, ñeñt̄ña eyarra po'rraspa' ñeñtpa' o'ch anem̄ cornesha' e'ñe allohuhanen Parets po'ponro ñeñt̄ ochñartsocpatets. Tarraña ñeñt̄ña eyarra po'chetspa' amach esesha' rrenaye. Ñeñt̄ña po'chetspa' o'ch anmet a'yo all amaacheñempañooyaye, allcha' chamoset. Tarraña te'ña yocop ñeñt̄ amtsarettertsa yo'chñarecop ñeñtpa' Cristo. Yapa' ñeñt̄ po'ñoñ pocrram̄ pen yecamquëñ allohuheney ñeñt̄yemtenaya ña. Tarraña ñeñt̄ aftera corneshatets judionesha' poctaþñacop all po'prahuo peñet, ñetpa' amach errotenot pocrram̄ petoña Cristo.

12 Ñam̄a atto anenan judionesha' eyarra po'chets a'yo all amaacheñempañooyaye, ñeñtpa' añ toma'ntena atto Cristopa'cho'ña anmet a'yo all amaacheñempañooyaye allcha' e'ñe puemuerochtateñoñetpa' o'ch rrroma. Attoña e'ñe ña po'rraso a'cohuentaterrey Partsocop.

13 Ñeñt̄marña te'pa' e'ñepa'chña yesuanom ñeñt̄ ahuat yocataþña ñeñtara ñeñt̄ ya'netser yepenpa' o'ch ahuey a'yo allo'tsen Jesús. Allcha'ña yemuerochtapretosya yanña all atarr otnare'tyeñet. **14** Tarro'mar aña patserpa' ama añaeyaye ñeñt̄ po'ñoñch ya'netser yepen tarro'mar ñeñtpa' huañerrcha'. Yapa' añaña ye'nen ñeñtcha' ya'netser yeperr ñeñtcha' yenterr Yompor pue'ntaño ñeñt̄ ama ahuañano ama't e'ñe errponaña. **15** E'ñe yeyemteñoñ Jesucristo chocmuela'chña ya'ye'chochtateññañ Yompor. Atto chocma ya'ye'chochtateññañ ñeñtpa' añ toma'ntena ñeñtcha' yapueñ Yompor atet peteñt̄ ahuat o'ch muetset eyarra ñocop.

E'ñepa'chña ya yenamoñ ya'ye'chočhtateññañ pa'so'cheñ attochña e'ñech yocshateñ. **16** Ñama chocmuepa'chña e'ñe cohuen seyenpannena ñama e'ñech cohuen sa'muerañtena. Tarro'mar te'pa' ñeñtña atto es yapueñ Yompor ñeñtcha' atarr coshatene' ñia.

17 Ñama ñeñt sa'mcha'tareternesha' sepa'yenpa' chocmuepa'chña same'ñenanet, tarro'mar ñetpa' añecop anareñtenet ñetcha' cohuanpnenet secamquëñ Yomporecop. Ñama Yomporpa' eñotatuerranetcha' ñeñt atet pa'yenet, ñato' e'ñete' cohuen cohuanpenset ñato'pa' amate' cohuenaye' cohuanpenseto. Ñeñto'marña socoppa' añ poctetsa e'ñechña cohuen same'ñenanet attochña ñetpa' e'ñech pocsheñeshocmañen torrenet socop. Amuepa'ch čha sellcatatstenaneto tarro'mar ñerra'm atetpa' amach errotenot coshaterrsetoña samña.

18 Ñama te'pa' o'ch notas, chocmach sema'yochampenya. Yapa' yeñotena yeyočhro ama eñalle attoch po'poñ yentannena. Yapa' añña yemnen chocmach yorrtatyen ñeñt atarr cohuen enten Yompor. **19** Ellopa' o'ch alla noterrserr chocmach sema'yocham̄pesna allochñapa' amach atarr atomatatstopa' o'ch alla necherrerr sesho.

Arrpa' all so'tnerranet po'cartot

20-21 Te'ñapa' Yomporepa'chña e'ñe ahuamencañ sepene' ama't allohuen pa'namenacop ñeñt atarr sherbets ñocop. E'ñe yame'ñeoñ Puechemer ñeñt Jesucristo ñachña ya'cohuentatene'ña ora yočtapña ñeñt atet yočtape'chyen yeyočhro allochñapa' attochña e'ñe cohuen yočtape'cherr

ora allohuuen ñeñt̄ cohuen enten ña. Attochña e'ñech cohuenare' sorrtatyen ñeñt̄ e'ñe atet muenen ña. Ñeñt̄pa' ñeñt̄ara Yompor ñeñt̄ e'ñe yocshatene' yeočhro ñamá ñeñt̄ara ñeñt̄ tantaterre' Puechemer rromot̄ ñeñt̄ Yepartseshar yepen, Jesucristo ñeñt̄ña atarr cohuen yecuam̄pene' atet ñerra'mrrate' ñeñt̄ atarr cohuen cohuam̄pene' po'carrneror. E'ñe po'rrasoña alloña a'poctatonay ñeñt̄ e'ñe etserra ñeñt̄ña a'poctateñetspa' ama't errponañapa' amach huañerro. Te'ña e'ñe tayoñeñpa' yecohuentatoñepa'ch Cristo ama't errponohuañen. Ñeñt̄pa' attetepa'ch Nompore yocop.

²² E'ñe allohuuanen masheñneshacha' ñamá nočhaneshacha' o'ch alla noterrserr, e'ñepa'ch cohuen se'mñoton neñoñ ñeñt̄ allpon o' alla noctape'chaterres tarro'mar ama atonaye' ñoñets nequellquënnaso. ²³ Ñamá o'ch neñotatas masheñ Timoteopa' o' alla a'rroyeret. Ñerra'm ahuencha' čhap arrpa' epsheñ'o'mareypa' o'ch ahuey o'ch yemo'tensa'.

²⁴ Ñamá napa' nemnen o'ch nehuom̄cha'ch necartot̄ allohuuen ñeñt̄ sa'm̄cha'tareternesha' seña'yen, ñamá allohuuen masheñneshachno ñeñt̄ pueyochresha' pen Parets all sesho. Ñamá italio'marnesha' ñeñt̄ ame'ñetsapa' ñetpa'čho'ña mueneñet o'ch huom̄cha'taset ñamet añ necartot.

²⁵ Te'ñapa' Yomporepa'ch sa'nataya allohuenes. Ñeñt̄ach notas, ñeñt̄pa' attetepa'ch Nompore. Allohua.

**Yompor Po'ñoñ ñeñf attō Yepartseshar
Jesucristo e'ñe etserra a'poctaterrnay
Yomporesho**

New Testament in Yanesha' (PE:ame:Yanesha')

copyright © 2008 Wycliffe Bible Translators, Inc.

Language: Yanesha'

Translation by: Wycliffe Bible Translators, Inc.

Yanesha'[ame], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Yanesha'

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

fa985bb4-fad0-5968-9ee4-626b89cba24f